

宣
統
新
疆
圖
志

新疆圖志卷一百四

奏議十四

國朝 修國朝

遵 旨兼總署大臣會陳新疆交涉情形摺

勦滅綏來謀叛回匪請獎卹存亡員弁摺

招俄商夥辦塔城金礦摺

撫循回衆扼防邊境摺

焉耆府仍辦蒙部交涉事件及改留照磨巡檢片

建設伊犁總兵衙署濟木薩城垣省城軍裝局火藥庫片

會奏新疆增改府廳州縣各缺摺

遵 旨兼總署大臣會陳新疆交涉情形摺

竊 臣等承准吏部咨光緒二十四年十一月二十二日內閣奉

上諭嗣後各直省將軍督撫均著兼總理各國事務大臣隨時與總理衙門王大臣和衷商辦以期中外一氣相生遇事悉臻妥洽

欽此旋承准軍機大臣字寄十一月二十六日奉

上諭近來各國交涉事件日益紛繁昨諭各直省將軍督撫兼總理各國事務大臣以便因應此後遇有交涉細故應就各省地方情形斟酌妥協即行辦理不得概從延誤其實在關繫重要事件必須商明總理衙門方能定議亦應隨時據實電咨切勿含糊掩飾以致往還輾轉徒費周章將此通諭知之欽此欽遵先後咨寄前來^庚與^臣應祺往返電商竊維新疆地處極邊西北緊與俄界毗連西南一隅復與英屬外部接壤省城伊犁塔城喀什噶爾等處均已駐有俄領事由各道設立中俄通商局領事會辦交涉事務喀什噶爾一處近年英駐游歷兼辦印度事宜上年由駐京英使照會總理衙門請嗣後印度商民交涉事務准英游歷官與中國地方官商辦現定條規大致與領事相同計沿邊六千餘里交涉紛繁綜其要領大致不外商務界務及查拏匪犯維持民教數大端新疆地屬陸海商務初興與沿海沿江通商口岸不同從前中俄條約俄商在蒙古及天山南北兩路貿易暫免納稅故俄

商出入邊卡僅派員驗票稽查無裨稅餉惟商務漸增則貨帳愈形糾葛雖中國商民該欠俄商帳項照約官不代賠但約內載有准以貨相易抵帳等語一遇中商拖欠領事卽照請追交變產毀家不容緩讓間有無力歸還及避匿不到者領事卽指官爲狗庇喫喫不休若中國商民赴俄貿易每在俄界虧本及被扣留加徵私罰等事回時呈道照請查究領事則多方推卸其能著落完結者十不獲一近日中英交涉商務英游歷意存操切臣應祺援引各國條約飭屬辯論漸已就緒此商務糾葛之情形也沿邊界務從前議和大臣因伊犁惠遠等城係俄代收代守並初約過濫徐與磋磨補救是以於光緒十年續定界址較舊時均有加增伊犁甯遠塔爾巴哈臺等處中俄城卡對峙鷄犬相聞舉步可達臣庚歷年會商塔爾巴哈臺參贊大臣並與臣應祺督飭伊塔道伊犁塔城鎮協查勘要隘添築卡壘挑派弁兵責成巡察以守爲防從未敢稍有疏懈自伊犁迤西至喀什噶爾以南大山橫互深邃動

逾千里原日勘界大臣遇人跡罕到之處遙指山水劃分周匝卡倫遠近本未盡一俄自經營塔什干費爾干等省駸駸東向英防擾及印度遂乘坎部內變而收併之光緒十七八年俄英爭分大小怕米爾在中屬爲甌脫之地得其民不可耕使然事關邊防大計慮失險要前護撫臣魏光燾升任撫臣陶模並臣應祺前在藩司任內會商前喀什噶爾提督臣董福祥等派兵扼要駐防清吾邊圉一面委員分赴山內查勘形勢繪圖立說曾經咨送總署有案前年訪聞俄英會立祕約係就中屬薩雷濶勒爾山陰阿克蘇河以西劃分臣應祺商詢前後各提臣密飭喀什噶爾道黃光達詳細查訪均稱薩雷濶勒爾大山爲中外天然界限喀什要隘以色勒庫爾布倫庫爾烏魯克恰提恰哈瑪克四處爲緊要門戶而四處之中色勒庫爾則以新安達坂喇斯庫穆爲藩籬布倫庫爾則以蘇巴什木吉爲藩籬烏魯克恰提則以業干爲藩籬恰哈瑪克則以黑子霍爾罕托雲爲藩籬此外木虎素蓋提兩處亦關緊

要現均派兵設卡嚴防勤探以備不虞俄英分界尙與邊防無礙
每屆三年中俄派員會查界務一次¹²等分段委員履勘牌博概
係照舊豎立惟邇年來俄英商民分赴各城交易其從前封禁及
未設卡倫之處領事等往往堅請開禁移卡意存嘗試規吾守備
¹²等照約爭執未允輕議更張此界務謹守之情形也查緝逃犯
各辦各國之人載在通約中俄續定界址布回哈薩克等部皆係
就界割隸加以白逆餘黨率同回纥投俄安其邊境中俄壤地處
處相錯地方官及卡倫弁兵無論如何認真清查而乘隙混入勢
難盡絕此等逃人平時自認爲中屬之民一經犯事則轉報領事
稱謂俄屬地方官就票查訊布纏哈薩克等名字同音最夥輾轉
繙譯領事強執廢票爭執前數年伊塔一帶俄民越界搶竊之案
層見迭出交辦則支吾不收緝犯則推卸不解卽獲正犯狡展不
認解回擬辦亦有旋解旋來之事且各城久隸中屬之人或置產
娶妻生子犯事冒認屬俄領事百計袒護藉爲勾引之媒猶必請

予地方官以違約查訊之咎蠻觸橫爭不可理喻其俄民在中屬有被搶竊傷害等事領事據一面之詞文致牽連必欲重辦方能釋然各道按律定讞靡不多費唇舌歷年俄領事因案電達總署諸多架砌此查拏逃匪逸犯齟齬之情形也教案一事各省皆有沿海沿江省分最多新疆布哈纏回咸習回教故從無傳習洋教之人間有內地教民流寓此間確查亦屬無幾此民教尙屬相安之情形也等語肅重寄顧念時艱交涉日益繁難自當審慎權衡爲結隣全交之計現在省城領事頗通華言文字推誠相與尙能勉就範圍伊犁塔城喀什噶爾各領事遇事故與爲難幾致不可情動而喀城撤領事則尤甚焉茲荷

聖恩訓誨周詳飭兼總理各國事務大臣惶悚殊深嗣後亟應勉竭愚忱凡交涉細故卽酌理準情和平商辦力求速結重要事件悉心會商務在慮遠防微主持正議力顧大局如有必須咨商總理衙門方能定議者恪遵

諭旨隨時據實電咨決不敢孟浪遷就掩飾推卸輾轉延誤有負
聖主諄諄誥誡爲國爲民至意所有兼總署各國事務大臣並新
疆交涉情形謹據實直陳伏祈

聖鑒訓示施行

勦滅綏來謀叛回匪請獎卹存亡員弁摺

竊查新疆回族最夥有緣回漢回纏回樸拙尙各相安漢回則土
客雜居良莠不一又分老教新教雖皆以謨罕默特爲宗而老教
守正新教則爲愛力一門之別派其流弊多變爲邪阜康吳勒者
子自謂得安德璘眞傳到處以邪說惑衆於清真寺外改設教堂
爲道堂各立一稿哇里主之數鄉老副之初亦不過教經後乃謀
爲不軌綏來回民馬三即馬玉獐二十一年之變因帶團捕匪得
保州吏目家頗殷富吳勒者子感以邪術謂其有二十年清真王
之分只候天主口號到時自有天兵天將相助馬三信之遂拜吳
勒者子爲海元帥穆薩阿洪爲軍師張三鐵復興馬依麻木等爲

大頭目與昌吉阜康呼圖壁迪化各稿哇里勾結約期爲亂其謀甚秘雖鄉老亦不全知也吳勒者子今春改漢裝爲纏去髮而微留其鬢往來省城與穆薩阿洪密相結形迹可疑臣當飭密查據巡檢馬紹榮留營差弁海占龍馬占奇均報該逆實有不軌情事正飭掩拏將鄉老劉進才管押該逆聞風先遁忽於五月二十七日據瑪納斯協副將曾松明馳報二十五六日疊據回民馬智元吳啟山沈得元等密報馬三定於二十六夜謀反襲城時署該縣黃廷珍履勘渠工公出曾松明卽商典史曾壽樓密飭弁兵民團不動聲色分段扼備瑪納斯本合南北中三城爲一地廣兵單馬三城內舖房甚多其住宅卽在南城協署之後抵暮閉關搜查毫無影響而馬三先一日出居其鄉莊三更時火光突起人聲鼎沸城內到處皆賊城外之賊由西南角梯城而上千總朱楚南首先迎擊短兵相接致頭面臂膊俱帶重傷把總蔣富仁督隊接應立斃悍目餘賊稍卻城內伏賊洶湧齊起都司藍德清與千總曹喜

分路巷戰擊斃馬三之婿馬從復並悍賊十餘人由後街繞撲馬隊營壘藍德清折回督隊開槍大聲喊殺致左脇被槍子穿過裏創血戰仍不稍卻卒保其壘賊攻縣署糧倉典史曾壽標與協標所派把總周香喬夏允嵩等率丁勇固守賊以大斧斫縣門未開陣亡縣書二名壯丁五名賊分悍黨爲兩股一由中城南街一繞北城徑撲中營圍指軍火曾松明督隊拒戰蔣富仁由城上繞回營內扼守賊率梟鷲猛撲十數次均未得成排列彼此對放槍礮幸毛瑟犀利斃賊極多紛紛撲跌城下相持達旦賊不能支由城北衝下中城經鄉約團紳遊擊吳蔭南張義張永勝等率團堵禦賊遂敗退而吳蔭南九人均歿於戰事馬三見四攻不能進撲城不能開又連斃其逆婿悍目始率死黨越城狂竄各隊跟追擒獲助逆受傷之犯馬生福馬彪等七名紳民細送助逆受傷之犯王主麻子四名匪首鐵復興爲鄉約沈得元所獲據供係馬三姻親吳勒者子同謀造反因省城捕急來此起手夥黨五六百人已

勦斃不少訊畢當卽軍前正法共計斃賊七八十人陣亡員弁五
名紳民十名受傷員弁兵民三十七名都司藍德清受傷後旋即
陣亡此五月二十六夜綏來逆回倡亂襲攻縣城官民預防力堵
當經擊敗之實在情形也。接稟報卽派撫標右營遊擊徐積誠
中營中旗馬隊守備譚迪安兼程馳往助勦飭曾松明安布城守
卽分隊跟踪追勦並委遊擊焦生有就近在綏招其舊部練馬隊
一旗由協管撥給軍火同赴該處南山搜捕餘匪通飭庫爾喀喇
烏蘇呼圖壁昌吉各營撥兵兜勦一面飭迪化城守協副將查春
華撫標中軍參將張俊三嚴戒城防會同迪化縣劉兆松與新宇
營參將楊金榜設法緝拏同謀之穆薩阿洪李汶興王兆成訊明
立置之法省城謠言漸息人心爲之稍定復飭總理營務處布政
司趙爾巽籌布防勦一切事宜並委兼臬司鎮迪道潘效蘇已革
奉天東邊道宜麟總理省城團練選募天津商民丁壯五百名編
成營隊協助城防派弁四出偵探旋得馬三自率數十騎已由綏

來南山潛赴迪化東山之信當派署城守都司唐寶。率守備馬占奇海占龍挑帶回勇數十名尋踪追捕遇賊於白楊河擊斃悍目數名該逆先踞山險開槍抗拒陣亡把總楊萬良受傷回勇三名斃馬三匹士氣益奮冒險窮追奪獲賊馬十三匹皮包布包四箇內鉛子千餘火藥六十斤洋火四匣矛桿七根杈子鎗一根麪米乾糧數百斤該逆乘夜逃入深菁次日添派楊金榜率隊偕唐寶臣由博克達山西麓向東而進齊上海臺會勦比至東嶽廟四望已無賊踪尋據住持口稱昨日有回匪二三十人到此少憩隨即分逃現已不知去向各軍分路搜捕而下陳天榮擒獲馬成功並同團勇擒獲丁富有馬魁馬金堂交楊德發解省訊明斬訖藩司趙爾巽夜出巡查盤出逃匪馮興道親提鞫問供稱同馬三敗逃上山見官軍追急乃分途逃命隻身溜入省城探親不知馬三何往等語。飭迪化縣劉兆松密派回紳楊金堂等設伏烏拉擺葦湖內將逆首馬三並其少子馬添祥拏獲海占龍等亦捕獲譚

生魁金中玉等解省當飭兩司會訊據馬三供聽信吳勒者子邪教充當綏來稿哇里同謀造反教令製備白巾白衣上書回經並各給護身符一紙謂可封槍礮刀火不能傷身因各道堂糾黨未齊原定六月十二日比照同治三年破陷烏魯木齊之期分由庫車喀喇沙爾綏來兩路動手不料吳勒者子被省城捕急於五月二十五日自帶夥黨十八人逃至綏來以事機敗露急欲在綏舉事約以哈喇胡爲口號書於綠邊白心旗上定二十六夜分頭撲城不料官兵防備嚴密槍礮利害當被擊出因吳勒者子曾言昌吉呼圖壁俱預備有人所以隨帶數十人希圖糾合徑撲省城又不料到處有兵把守祇得從僻徑繞入東山再作打算復被跟追逃避無路今蒙拏獲實係誤聽吳勒者子蠱惑謀反後悔無及等供復經臣親提鞫問所供直認不諱當卽恭請

王命將該逆首馬三卽馬玉獐綁赴市曹凌遲處死懸首犯事地方餘匪一併正法此省城防勦竄回拏獲首要各逆就誅之實在

情形也綏來擊散回匪後該署縣黃廷珍聞驚率石河子紳團星夜馳回次晨抵城根遙見大股賊匪向南逃駛率團追趕獲匪二名旗一面陣亡團勇一名又追獲逆眷婦孺數十口蓋謀逆各回自各鄉莊遷來預備襲占入城後安處衙署者也紳民陸福緯史信王占魁吳啟山張明德等細送受傷回匪馬生福黑旦子馬成吳成二里子馬哈三馬林葉福李朶鐵兒等十三名訊係撲城槍械所傷當并前獲二匪悉正典刑曾松明會商徐積誠暫駐綏城以安人心分撥哨隊同譚迪安焦生有各帶馬隊進山分赴石廠及甘溝等處搜勦烏合之衆各鳥獸散惟逆目馬聰驅同黨槍手並裹脅逃回百餘人東竄呼圖壁一帶經署撫標左旗馬隊楊大鵬與巡檢武永清追拏逆目趙老九擺大帥卽擺玉連奪獲洋礮馬刀回文符片勇丁受傷一名復會同戶勇追捕田文舉趙幅兄弟三名奪獲馬匹槍矛回文符片訊皆綏來打仗敗匪一併批飭正法訖初七日忽報有大股回匪竄入寺人溝楊大鵬派把總王

敦仁追之會商譚迪安分道進溝一由後路一截前路兩面夾擊以期聚殲初八日王敦仁同戶勇盧天福等追至石門子見數賊迎面來撲合力奮擊賊愈戰愈多相持數時之久槍斃悍賊數名帶傷多名營勇李富貴楊春芳受槍陣亡尹錫賢等均受重傷戶勇陣亡受傷各數名盧天福被槍由乳旁洞穿死經四日復甦譚迪安聞警馳往賊見兵勢漸多潛匿山後伐木爲橋偷渡呼圖壁河腦徐學功焦生有由綏來搜山適至開赴山溝各處尋捕不見一賊料逆黨不能株守荒山必圖竄逸詔派都司楊德發新字旗總哨提督吳首懷率精騎百餘進紮謝家灣邀其來路果於花石頭溝遇賊大股不意官軍猝至拼命死鬪陣亡勇目李保初李春福鄧成雲三名受傷四名吳首懷怒馬陷陣額受矛傷血流被面曾不稍卻楊德發爲深澗所阻躍馬經渡繞從賊後包抄各騎繼之勇氣百倍自未至戍連環轟擊斃賊三十七名墜崖死者不計其數殲除殆盡僅餘數賊天黑收隊次日搜山官兵及鄉勇搜

山擒獲四名此股殲除淨盡此綏來餘匪東竄經呼圖壁營圍追捕並省城派隊勦滅之實在情形也此外庫爾喀喇烏蘇營盤獲逃匪馬有幅昌吉拏獲匪首張三卽張國得匪犯吳滿庫鐵貴韓三哇子阜康拏獲夥犯馬成功均就地正法所有省關稿哇里買二金卽馬二里子阜康稿哇里馬相卽馬祥呼圖壁稿哇里韓二里古牧地稿哇里王兆成俱各解省伏誅惟吳勒者子一犯據綏來縣黃廷珍等會稟連日諭圍搜捕據三工戶民王生福稟稱五月二十七日見一回匪神色慌張向前盤問該匪卽放六響手槍未中王生福持矛猛刺適中該匪胸膛立即倒斃搜獲隨身回文銀圖記二顆瑪瑙數珠一串回經一本核其年貌確與吳勒者子相符惟屍經野獸殘食不全無從驗證。札取各物至省與前獲各犯所佩偽造護符查對圖記係吳勒者子傳教名字回語謂之帽爾經文的是吳逆平日傳教所用質之續獲各犯俱指爲該逆隨身不離之物復由昌吉拏解其妾吳蘇氏到案辨認各物屬實

並自認裝盛經本數珠之羊皮肚袋褲帶亦係該犯正身所繫供
證確鑿謂死無疑該逆妖言惑衆惡貫滿盈竟爲鄉民刺死骸骨
不全此亦天網無漏但倖逃顯戮死不蔽辜 仍飭屬確查不敢
遽爾弛捕竊維天方教之入中國已千百年新省半屬回疆勢難
禁絕惟歷來叛亂皆由新教綏來乙未之變相去纔四年耳一經
吳逆煽惑馬三以回紳之首甘爲叛逆之魁蓄謀甚深聲氣甚廣
旬日間竄擾五六百里陣亡三十餘人受傷猶不止如所報之數
幸發覺在先籌勦籌防尙皆順手未致遲誤事機牽動大局此皆
遙託

皇上福威迅就殲除非 始念所及也查吳逆乃回類之敗類其
教背乎老教並爲新教之異端 通飭各屬將所設道堂一律拆
毀產業充公嗣後止准在寺唸經不准再立道堂並不准私設教
堂以免朦混而滋事端除同謀在逃之匪仍飭分緝務獲外若但
誤從其教而未與謀者勒令改歸正教准予自新不再深究以安

反側所有在事文武官紳漢回國民或定變倉猝力保危城或帶隊勦捕奮不顧身均屬異常出力有裨邊局理合仰懇

天恩分別獎卹以示鼓勵所有勦滅綏來謀叛回匪情形謹恭摺具陳伏祈

聖鑒訓示施行

招俄商夥辦塔城金礦摺

竊查新疆五金並產而金礦最多久爲各國所艷稱升任撫陶模與先後派員查勘金礦曉諭官辦商辦悉聽其便議照各省辦法提成充餉就廠徵課以期漸開利源無如新省素乏熟習礦學之人僅恃人力開採官辦則設局招夫置器運糧核計入不敷出商辦則無人應募若於春冬農暇之時清查挖金貧民按名收課而此查彼匿交納極微開除員役薪工仍與度支全無裨益一切難期成效情形業經詳細

奏明在案其銀礦鐵鉛等礦類年百計圖維不遺餘力銅礦省

城附近南山及南路拜城庫車喀什噶爾等處皆設廠採煉每歲共能採銅二十餘萬觔僅敷各城鼓鑄紅錢之用按鑄紅錢四百文易銀一兩尙須稍賠局費鐵礦惟阜康縣屬之水西溝所產最良鉛礦則到處皆有然採煉徒守舊法費繁運重估價仍昂兼以俄鐵價廉爭售以故採獲鐵鉛但能製造土礮傾鎔舊式槍礮彈丸及民間日需之用寶爾吉開採銀礦創辦已近兩年公家虧欸頗鉅委員賠累不堪而挖獲礦坯日出日絀卽在廠員弁夫勇亦多受瘴亡故臣於去冬商派俄礦師同往勘查亦稱此廠礦好而衰旺難定現祇酌留匠工夫勇數十名駐廠接挖如果再難暢旺擬卽奏請停止惟金礦爲利源所在遞奉

諭旨興辦臣與升任藩司丁振鐸鎮迪道兼臬司潘效蘇冉三商酌擬派員與俄商夥辦以興地利藉資學習上年據情電商總理衙門飭令先與俄商妥議鈔錄合同俟奏資核准再行開辦等因臣隨飭司與駐烏魯木齊俄總領事吳司本迭次籌商有俄商墨

斯克溫願與夥辦派員同赴各處查勘礦苗據稱勘得塔爾巴哈臺屬之札工新興工蘭州灣及庫爾喀喇烏蘇屬之濟爾噶朗四處金苗較旺議定首年各出成本銀三萬兩會同購機修廠次第試辦請以二十五年爲期無利不拘年限停止每地一段歲納地租銀三百兩獲利均分不再徵收金稅先訂合同二十一條正月二十六日_臣將緊要各節電請總署代奏欽奉

電旨交總署會同礦路總局迅速妥議俟覆奏再行電飭遵照欽此旋承准電覆合同尙須酌改一塔城等處均係蒙地應先商明該部落劃清界址此外可開金礦隨時奏聞不得籠統載入致被俄商把持爭執地租一項應分別地段廣狹定價以免偏枯一礦產出井出口均應納稅所得餘利亦應提成充餉以符定章一銀銅煤炭礦各歸各案奏辦不得一併敘入以上各條應先與俄領事等商改後暫准試辦仍俟合同全文到時覆核奏准方能定案二月初六日奉

旨依議欽此咨新照辦_臣遵卽轉行妥爲商改經前署藩司潘效
蘇護理鎮迪道朱冕榮復與俄總領事和衷籌商另議簡明合同
十九條其中緊要各端如塔城等處礦地劃清界址每段不過俄
尺十里每段每年公納地租銀三百兩津貼蒙民此外可開金礦
及銀銅煤鐵各礦一併刪除均未載入約內金稅一層徐與磋磨
商加俄商應允每年截算一次得金一千五百兩以內百分抽一
一千五百兩至二千五百兩百分抽三二千五百兩以外每百抽
五無論出井出口均只認稅一道提成一層該俄商等謂遠來中
國夥辦金礦先費資本已多將來利益若何尙不可必現議地租
金稅已竭竭力勉從若再提成力恐不逮等情維礦務章程所載
官商華洋股分皆不與交涉相關然提成充餉大利不盡歸公新
疆此次會辦金礦司庫籌提成本得金若干除清還成本開支廠
費外餘皆涓滴歸公概充餉項較之定章提繳二五公家得利尤
多俄領事既堅執祇認金稅一道不允提成自應准予通融俟辦

有成效每歲公廠年終結報公家實應分利若干卽行全數報明戶部聽候指撥總求逐漸推廣如果中屬匠工隨同學習有成效時另設專廠卽可開利無窮該俄領事等因合同改定機器匠工已先後到齊商請派員會同設廠置機立候興工現已派委熟習俄文言語之候補知府桂榮馳赴塔城工所充當總辦另委候補巡檢王鴻業施再萌候選從九段子麟一同前往幫辦採運監工稽查等事各專責成仍一面與俄領事議定暫作試辦俟合同覆奏奉

旨允准彼此畫押蓋印方准定案廠內需用成本新疆應認銀三萬兩司庫暫無閒欸可提已由軍需項下撥挪支撥交桂榮帶以備用將來公廠獲利仍照數歸還以符原議 爲新疆利源起見是否有當謹恭摺具陳伏祈

聖鑒訓示施行

撫循回衆扼防邊境摺

竊臣承准軍機大臣字寄光緒二十五年九月初五日奉

上諭有人奏甘肅客回太衆請飭設法鈴束並嚴檄防軍於北路扼要防堵各摺片甘肅回匪上年經官軍勦定後餘孽尙多本年五六月間新疆綏來及甘肅海城地方復有謀逆之事雖經隨時撲滅惟回衆良莠不齊思患預防不可不善爲利馭著陶模等嚴飭各營加意防範著責成地方牧令實力撫循務使懷德畏威潛消異志新疆密邇俄境尤恐逆回餘黨出界竄擾並著饒應祺派撥防軍扼要堵截以靖邊圉原摺片均著鈔給閱看將此諭令知之欽此遵

旨寄信前來仰見

朝廷籌邊綏遠思患預防莫名欽佩臣維新疆本北準南回自乾隆勘定後回族遂徧於南北迨陝甘回變經大軍節節追勦逃竄來新白逆敗遁入俄餘衆仍收留南北兩路上年河湟之變竄匪出關官軍勦撫解赴羅布淖爾安插者僅數千人而婦孺老弱就

撫爲氓分散四方隨地謀食者約數萬計近年關內糧貴回民由甘肅領票遷徙西來據哈密營卡所報每月或三四百人一二百人絡繹不絕於途以漢回皆

國家子民隴塞莫非王土謀弭內患者曾有徙回關外之議前奉諭旨垂問以事體重大籌辦維艱商由督陶模覆陳在案嗣因軍事就平關內回民復扶老攜幼不遠數千里接續自來職任撫綏不敢意存畛域且以密邇強鄰非加意拊循難免爲毆叢毆淵之漸因飭屬聽其依附親族農工商賈各自謀生藉爲實邊之計較徙減等人犯屯墾者尙少逃亡邇年來省城及古城等處商民庶富漸臻較前似大有起色夏間綏來回逆滋事查係以前土客回民新來之戶皆未與聞惟人數既多良莠不一現飭各屬編查保甲凡業工藝商農者一體列入戶冊其實無執業者概令酌撥荒地責成開墾暫緩升科使各有爲善之資庶不致窮無所歸流而爲匪第應籌牛具籽種等費爲數不貲當此時事艱難

勢不能另請撥款。擬就每年所撥善後款內酌量勻給飭令各廳州縣盡心籌辦妥爲安置以副

諭旨實力撫循之意所有墾費伏祈

飭部立案以便歸入常年銷冊造報至所屬邊境西北界俄西南界英處處壤地相接。深慮逆回出界竄擾是以前值綏來回匪謀叛卽咨明提鎮通飭南北各路營旗嚴密設防並電知伊犁將軍塔爾巴哈臺參贊大臣暨喀喇沙爾各蒙部派兵會同扼守各隘口合力堵截幸賴

聖主威福隨時殲除未致紛竄爲患八月初烏什回民白進才李長幅劉大彝哈永荃馬得幅黃魁等知綏來回叛而不知已全數撲滅密約會匪數十人於八月十二日晚放礮起事有成則與綏來合夥敗則走哈喇湖之說幸營弁訪聞得實倉猝告變經該署副將湯詠山署同知高敬昌立時捕擒首犯七名訊明正法被脅餘匪分別輕重懲釋邊境已如舊又安。思回性多疑善詐貪狠

好殺漢唐迄今習俗難改而惡惡好善祈福悔禍人情大抵相同其久經變亂之人知作孽難追天厭人誅從前之遷播流離玉門之敗亡凍餓未嘗不悔於厥心間有不逞之徒誘之爲亂多不願從故歷次俱難集事迅卽平定良以性質雖多頑梗要亦不盡無良結之以恩未必不樂爲我用

臣仰體

聖主如天之仁賞罰賑卹無分漢回省城南關之修廂城羅布淖爾爲之設縣治該回等尙知無歧視之心同安耕鑿是以聞變秘告俱畏牽連此次綏來叛事回紳出力最多尤其明證不敢謂彼族長治久安不再滋事但收之字下叛則討服則舍生殺予奪之權操縱在我辦理尙不爲難若一經越界則捕之棘手適貽他人以口實白黨之在哈喇湖迄今猶爲隱患現聞苦其苛歛各有歸心俄官因其人多桀驁亦不樂於招攜刻尙相安無事然聲類相通究不可不時加密查防其勾結此微區區愚衷勉籌大局不自量力甘爲其難明知回衆難於馭制而不敢禁其不來拒送

回甘留患於關內亦不敢磨之使去驅逐出疆移禍於境外也惟
新省幅員遼濶隘口紛歧處處設防兵力殊嫌單薄臣惟有修明
政治講求武備撫循務寬防範務嚴恪遵

聖訓咸使懷德畏威以消異志而靖邊圉其各處舊設卡倫暨緊
要邊隘仍嚴飭該防軍堅守梭巡無任匪徒出界侵擾致啟邊釁
以紓

朝廷西顧之憂臣爲鞏固邊防起見是否有當伏祈
聖鑒訓示施行

焉耆府仍辦蒙部交涉事件及改留照磨巡檢片

竊臣前奏新疆羅布淖爾屯田安插就緒謹擬建治設官以資彈
壓一摺經吏部等會同議覆所請升喀喇沙爾廳同知爲焉耆府
知府添設知縣縣丞典史及遊擊守備千把文武各缺均已照准
惟該同知所屬之照磨布告爾巡檢二缺仍令體察裁改並將一
切未盡事宜會商妥籌再行奏明辦理等因覆奏奉

旨依議欽此欽遵咨新 遵即督同藩臬兩司細加體察查新設焉耆府知府與土爾扈特和碩特游牧地方犬牙相錯時有蒙民交涉事件原設喀喇沙爾同知曾加理事同知銜現已改升知府礙難再兼小銜應請嗣後凡遇蒙部交涉事件悉令照舊會辦藉資撫馭原設同知照磨一缺該廳既升府轄縣遇有代折代行護印等事必須品秩稍崇之員就近派委擬請升同知照磨爲府經歷仿迪化府經歷兼管司獄事應設吏役額數並應支廉費俸工照依新省府經歷定章辦理併案開單咨部立案將來應定爲何項缺分俟委署一次後與知府等缺一併酌定奏咨照吉林新章由外揀補一次以資治理布告爾巡檢一缺地方繁庶彈壓稽查均關緊要應仍照舊設官駐守該處距新平縣較遠地界不相毗連擬仿雲南貴州等省巡檢徑隸知府之例仍歸焉耆府管轄毋庸裁改等情由署布政使潘效蘇會同署鎮迪道兼按察使銜李滋森具詳請

奏前來 覆核該司等所議尙爲因地制宜起見相應仰懇
天恩飭部核覆以便遵循謹奏

建設伊犁總兵衙署濟木薩城垣省城軍裝局火藥庫片

竊新疆南北兩路城垣暨文武衙署各工凡已修理完竣者業經
隨時造銷在案惟伊犁總兵職在守邊責任綦重且沿邊緊接俄
壤交涉事務極繁衙署不修外無以壯遠觀內無以輯衆志切實
勘估共需料銀一萬五千六百餘兩又迪化府阜康縣屬之濟木
薩爲北通蒙古要道亦省城東路保障形勢扼要該處舊有城垣
低薄狹隘兵燹後倒塌殆盡前飭委勘推廣修築估需工料銀七
千八百餘兩又新疆自設省以來採買外洋槍礮修整舊存軍械
製造火藥數各不貲亟應妥慎存儲以備緩急擬擇高敞地面建
修軍裝總局暨東西火藥庫分別確估共需工料銀八千九百餘
兩前項工程食糧均不在內派勇幫工僅議照章給予犒賞等情
由前署藩司潘效蘇詳請具

奏前來。維現值時艱，欸絀各省工程均應停辦。第念新疆建治設官城署各工，從前均議次第修理。伊犁爲嚴疆重鎮，衙署不修，洵不足以示威望。濟木薩城垣爲蒙部屏蔽，設戍屯糧均關緊要。槍礮軍裝爲邊防重件，新省採存較多，皮藏尤宜慎密。擬分起興修，與督陶模往返函商意見相同。已飭先期舉辦，所需銀兩仍請於歲撥善後經費項下動用，不另請欸。除俟工竣核實報銷外，謹會同陝甘總督陶模附片具陳，伏乞

聖鑒訓示，飭部立案施行。

會奏新疆增改府廳州縣各缺摺

竊維綏邊置吏因地以制宜，增治建官隨時而盡善。新疆爲古西域三十六國周迴二萬餘里，前任督左宗棠於光緒四年克復全疆後

奏請改建行省，擬設郡縣頗多。督譚鍾麟以地方新復，議暫於南路喀什噶爾阿克蘇兩處各設巡道七城，各設一官復經撫

劉錦棠通籌全局會商具奏於東四城設喀喇沙爾直隸廳溫宿直隸州轄拜城縣庫車直隸廳烏什直隸廳西四城設疏勒直隸州轄疏附縣英吉沙爾廳莎車直隸州轄葉城縣和闐直隸州轄于闐縣瑪喇巴什廳南八城建置既定始建省治於迪化城十一年

簡放劉錦棠爲甘肅新疆巡撫調甘肅布政使魏光燾爲新疆布政使原設鎮迪道加按察使銜兼管全疆刑名驛傳事務奏請升迪化直隸州爲迪化府添設迪化縣爲附郭首縣餘仍舊又升伊犁廳爲伊犁府增綏定甯遠兩縣添設庫爾喀喇烏蘇直隸廳精河直隸廳升塔城通判爲直隸廳同知裁霍爾果斯巡檢改設分防通判計通省四道二府十一廳四直隸州十一縣其時種民多未復業地曠人稀所設地方官足資控制迄今已十有八年土客回疆生齒日衆邊境安謐歲事屢豐關內漢回携眷來新就食承墾傭工經商者絡繹不絕土地開闢戶口日繁而原設一州縣所

轄或千餘里數百里撫字催科遠難親到不得不分派司事並用鄉約回目以助之而弊端歧出良懦之民多受其魚肉狡詐之民動肆其刁強牧令疏於防範率多撤任遇有命盜案件呈報勘驗往來動經彌月傷形糜費兇犯遠颺辦理實多爲難且府少而直隸廳州較多升調鼓舞之術有時而窮表率督察之權亦欠專重揆之今日形勢非增設廳縣升設郡守不足以宏治化而安邊氓查喀什噶爾道屬無知府惟三直隸州而疏勒州爲道首轄廣延一千一百餘里徵糧一萬八千餘石地富民繁五方雜處極邊重要擬請改升爲府名曰疏勒府原轄疏附縣徵糧一萬九千餘石兩處轄境均寬訟獄錢糧多難兼顧查有距府一百八十里之排素巴特當東路之衝居民繁庶歷駐防營彈壓不如添設縣治劃附近罕愛里克大莊轄之增設一縣唐伽師城擬名曰伽師縣莎車直隸州表延一千一百餘里地廣而腴近年新墾三十餘萬畝爲通省之最英商麇集交涉尤繁擬請改升爲府名曰莎車府所

轄葉城縣地亦膏腴且廣應劃府南之坡斯坎再益以縣北之一
肯蘇各莊增設一縣其水爲澤普勒善河擬名曰澤普縣又莎車
西南七百四十里之色勒庫爾爲坎巨提出入要路西踰阿克塔
什又與英俄接壤年來駐紮防營常多交涉採運糧草開墾地畝
必需得人經理擬請設分防通判地爲古蒲犂國擬名曰蒲犂通
判和闐直隸州廣延一千八百里徵糧二萬五千餘石銀一千四
百餘兩轄縣于闐徵糧八千三百餘石銀九千八百九十餘兩距
縣四百里之洛浦莊地廣民強擬劃兩屬地糧增設一縣名曰洛
浦縣瑪喇巴什直隸廳水利通判廣延八百里徵糧九百石銀一
千三百餘兩時與疏勒有爭水爭界之事擬請改廳爲知州歸疏
勒府管轄庶無畛域之分地爲古巴爾楚名曰巴楚州此擬西四
城增設大略也阿克蘇道屬溫宿直隸州廣延一千五十里徵糧
一萬九百九十餘石銀六千八百餘兩地腴民富南疆要衝擬請
升爲府曰溫宿府舊城巡檢距府二十餘里巡檢職卑難資管轄

擬請升爲縣曰溫宿縣距縣四百八十里之柯爾坪地遠民頑擬增設分防縣丞曰柯坪縣丞一員以資佐理焉耆府南六百三十里布告爾分防巡檢地廣民多詞訟錢糧向由該巡檢就近代理不如分設一縣以專責成其地爲古輪臺擬名曰輪臺縣新平縣轄境二千餘里光緒二十四年以羅布淖爾撫輯總回均已歸化安插甘回亦已就緒奏請改設一縣以資撫綏近因升署該府現任阿克蘇道江遇璞與現署該府劉嘉德設法開通溝渠招民屯墾業已水利暢行足蔭地數十萬畝該縣令草創經營近且不遑難再遠及距縣十餘站之卡里克分防縣丞地小而腴轄境甚遠東接敦煌南通于闐爲邊隅衝要之區擬請升爲縣以便專意開墾地方經理民事其地爲古婁羌國即名曰婁羌縣庫車直隸廳廣延八百里徵糧一萬餘石銀五千五百餘兩土性沃饒轄境遼濶擬請改爲州曰康車直隸州州南一百八十里之沙雅爾民風強健地僻而寬先年開辦善後本爲庫車分局不可無官鎮

攝擬請添設一縣名曰沙雅縣仍歸庫車轄此擬東四城增設大路也至於北路原設廳縣尙多惟迪化府阜康縣屬濟木薩縣丞距縣城二百五十里土地膏腴錢糧戶口較阜康爲多未便未大於本擬請升爲縣其底驛爲孚遠即名曰孚遠縣吐魯番直隸廳同知廣袤六百餘里徵糧一萬七千餘石銀二千一百餘兩距廳二百四十里之闢展巡檢轄境甚遠物產頗饒爲東南路衝要擬請分割地糧改升爲縣地爲古鄯善國卽名曰鄯善縣仍歸廳轄濟木薩縣丞旣升爲縣昌吉所屬之呼圖壁巡檢向收錢糧應改爲縣丞以便升調以上計擬升設三府改一直隸州一州增一通判九縣兩縣丞並各縣擬增設一典史如此分地而理庶民事可就近經理地利可逐漸墾興邊防亦益增嚴密矣其升設之知府卽仿照焉耆府例仍舊徵收錢糧管理訟獄卽以該直隸州舊有之養廉移爲知府養廉直隸廳改直隸州與知州亦然其缺均優原准公費悉行裁減增設分設之縣卽以該州縣原有之公費移

作養廉所升三府之州吏目卽改爲府經歷改直隸州之庫車照磨改州之瑪喇巴什廳照磨均改爲州吏目其餘有應添廉俸及縣丞典史俸薪書役工食修理衙署倉廩監獄經費擬仿照內地經徵錢糧例加收耗羨酌留動支升增各州縣皆舊有驛站不過酌增數處不須多添驛費均暫由善後項下開支不另請款除原有防營照舊駐防外其無防營者由就近防營撥駐亦毋庸再添防兵此皆亟應變置之事就地可以籌辦。應祺自光緒十五年出塞宣藩察看地勢民情卽擬變通辦理而未敢操切圖功歷經十四年悉心考察欲圖長治久安之策實無逾此亦何敢苟且遷延因循以廢吏治與。蕃再三往復函電相商。蕃查從前設官甚少係因地曠人稀現在人稠地闢政務殷繁委屬鞭長難及增設邊縣實爲良圖亟應詳議入告於吏事邊事均有裨益所有酌擬增設郡縣情形茲據甘肅新疆布按兩司會議請奏前來謹會同伊犁將軍。長庚署喀什噶爾提督。谷振傑合詞恭摺具奏

是否有當仰懇

天恩俯念邊疆重要地多官少

飭部議准照辦如蒙

俞允卽請

飭鑄各府廳州縣印信並補刊焉耆府新平縣印信派員祇領頒發啟用以昭信守至各府廳州縣如何劃分地界勻撥錢糧及各應作何項缺分與一切未盡事宜容俟奉准部覆後再行陸續分別奏陳再此摺係應祺主稿合併聲明伏祈

聖鑒訓示施行

新疆圖志卷一百五

奏議十五

國朝 奏議十五

請古城滿營地畝改招民墾摺

請移澤普縣治及巴楚州改隸莎車府摺

請遣散客勇改練土著世襲兵摺

請將巴里坤等馬廠改牧片

撫標精河營改隸伊犁摺

會奏關內協餉減估四十萬摺

古城滿營地畝已經開墾摺

請將古城滿營糧料按季折色摺

請古城滿營地畝改招民墾摺

竊 據古城城守尉呈稱古城滿營官兵前由各城遷併時於光緒十四年請由奇臺縣撥給東灣中渠大坂河西岔等處地二萬餘畝旋因官兵等差操緊要不能兼顧屯墾經各前任呈請展緩

均經奏明在案該官兵等歲需糧料又承照數分別撥供足資養贍所有前項地畝應懇將原撥奏案撤銷以免牽混等情查新疆各城滿營移駐古城光緒十四年經前撫劉錦棠奏明於古城東灣中渠大坂河西岔等處撥地二萬餘畝以資耕種旋據前城守尉德勝呈請展緩三年藉抒兵力比經前撫劉錦棠奏奉硃批戶部知道欽此欽遵行知在案光緒十八年又據前城守尉克蒙額呈請再緩三年復經前撫陶模奏明光緒十九年五月十七日奉

硃批著照所請該部知道欽此欽遵行知在案現經十年之久該官兵因差操緊要無暇兼顧屯種且其地有經奇台縣招民承墾者查該官兵歲需糧料均由奇台濟木薩各處照數撥供足資食用所有原撥古城東灣中渠大坂河西岔等處地二萬餘畝相應仰懇

天恩准其撤銷歸奇台縣招戶墾種升科納糧以盡地利而免久

荒是否有當謹會同伊犁將軍馬亮陝甘總督崧蕃恭摺具陳伏祈

聖鑒訓示施行

請移澤普縣治及巴楚州改隸莎車府摺

竊維因地制宜變通期歸盡善政貴經久始謀不厭詳求新疆地曠人稀設省之始改設新設各府廳州縣類皆因陋就簡粗具規模上年前撫饒應祺以設省二十年來人民蕃庶政事殷繁各州縣轄境過寬遇事時有鞭長莫及之慮察酌情形議請升改增設府州縣各缺以資治理奏奉

諭旨飭由政務處會同各部議准照辦行令將未盡事宜隨時奏咨於光緒二十八年九月二十九日具奏奉

旨依議欽此欽遵在案奉准部文適接任撫篆當即飭司委員分途前往會同各地方官將應行劃分界址戶口錢糧妥爲勘劃一面陸續揀員委署籌辦一切容俟冊報至日再行分別奏咨立

案惟其中有應行移設改隸之州縣原奏未能周備亟應陳明更正者二處一爲莎葉分設之縣原奏設縣治於莎車府屬之坡斯坎莊而以葉城縣屬之一肯蘇等莊隸之爲澤普縣查坡斯坎莊西距莎車府城九十里東距葉城縣亦九十里中間村落相望設縣似嫌太密惟葉城迤東噶瑪地方距葉城縣城二百二十里中隔戈壁百餘里前因距縣較遠民間完納折色糧銀諸多不便且逾噶瑪再東各莊及迤南山內各莊去縣更遠曾定章在噶瑪地方設櫃徵收凡遠莊之完折色者均赴噶瑪投櫃屆時葉城縣親往監收尙不爲難惟民間詞訟赴城太遠仍多不便現若增設縣治不特撫字催科清理訟獄較爲便利且該處東距和闐州治三百餘里地在適中聲勢亦甚聯絡擬卽以原請分設之澤普縣移設噶瑪於農商各務壹志經營自更日有起色該處爲古皮山國地應名曰皮山縣劃向來在該處投櫃完糧之各莊悉隸皮山而以原奏所分莎車府屬之坡斯坎莊改隸葉城錢糧戶口不甚懸

殊此移設縣治之有裨治理者也一爲瑪喇巴什廳改設之巴楚
州原奏稱與疏勒時有爭界爭水之事歸疏勒府管轄庶無畛域
之分等語查瑪喇巴什與疏勒爭水爭界之處在瑪屬之鐵里木
華莊地祇一隅若論水利較大地畝較廣則在與莎車府葉城縣
接界之麥蓋堤等莊蓋瑪喇巴什向隸葉爾羌自設官分治始以
莎屬麥蓋堤大莊分隸瑪喇巴什向與莎葉各莊俱用聽雜拉布
河水該莊在河下游曩因莎葉上游各莊墾荒甚多該莊時患缺
水疊次構訟委員查勘封禁上游墾地以顧該莊之水又澤普勒
善河亦踞莎葉上游經由莎車屬之頭臺以達二臺入瑪喇巴什
廳境下至瑪屬三四五六七等臺均地高水低難資引溉且五臺
水勢較陡每屆夏秋上游水漲必至決堤爲患論者皆以該廳不
得是河之利獨受是河之害而每歲必由莎葉幫工修隄前經屢
議由莎葉境內開渠以達瑪屬地內不僅開荒可獲大利且免水
患於無形卒以莎葉民情不願屢阻不行擬請以改設之巴楚州

改隸莎車府屬講求水利開墾荒田官無畛域之分民獲波及之
福利益實溥勢更順便此改隸州治之有裨治理者也據藩臬兩
司具詳請奏前來臣昔在和闐履經其地兩處情形均確有所見
當此創辦之初自宜因地變通期垂久遠除批司如擬分飭遵照
辦理外合無仰懇

飭下部分別更正立案以裨治理謹奏

請遣散客勇改練土著世襲兵摺

竊新省地曠人稀種類龐雜北路鎮迪所屬漢多回少伊犁塔爾
巴哈臺精河庫爾喀喇烏蘇等處漢民極少滿蒙纏哈劃地分居
生齒亦非繁衍南路各城概係纏回土著有古處風自乾隆年間
拓闢以來兵由內地換防餉由各省協濟同治初年全疆淪陷至
光緒三年始行收復改建行省文則設立郡縣武則移置提鎮自
副將以至守備以官帶勇以勇代兵餉仍內地協撥歲以數百萬
計實爲

朝廷一大漏卮在乾隆嘉慶道光時國富民殷裒多益寡以天下之財濟天下之用固屬無甚損益今則非昔比矣縱以本省無源可開不能自立亦當少糜帑項共濟時艱查北路草山甚多均極豐茂荒地亦復不少南路亦有草湖官地若將內地客勇徐爲遣散改練土著之兵以官帶兵以兵代勇仍與客軍營制無殊卽以屯牧養之毋庸另籌餉項實爲籌邊上策辦理之法擇戶民三丁以上者撥給上地十畝免其租賦並給孳生牛馬各二十五隻羊五十隻共計百隻令其家屬自行耕牧數口之家足資養贍內挑壯丁一人入伍充兵卽不發給口糧銀兩定以十年爲期大約自二十內外入伍三十內外出伍又擇其子弟中之年力精壯者接換充當名之曰世襲兵蓋地畝與牛馬羊隻本非現餉可比易人經理必多窒礙也惟欲專用漢民則萬難足額擬鎮迪所屬每營五哨挑用漢民四哨搭用回民一哨以示一視同仁之意以四制一決不敢稍萌異志且可藉通聲氣伊塔精河等處先儘漢民挑

選兼用錫伯索倫並各部蒙古南路則纏回甚多足供選募議者謂邊氓愚懦不足以資戰守不知若輩最耐寒苦若訓習步伐以暢其筋骸精練技勇以壯其膽略自與內地兵勇無異同一賦畀必謂北方之強不及南方之強非通論也第新疆自設行省經前任撫_臣劉錦棠奏明設立副參遊都守一百一十一缺馬步一百一十一營旗統共計二萬八千餘人屢經裁減尙不下二萬人_臣在新疆年久南北兩路足跡殆徧何處應駐兵若干務期不厚不薄斟酌盡善擬卽以馬步二萬人爲定額每步兵一名給孳生牛馬各二十五隻羊五十隻計一百隻馬兵自備鞍馬料草其牛馬羊隻皆須加倍籌給此外自護兵親兵以至營旗各官層遞加給切實估計共需孳生牛馬一百六十四萬餘隻牛馬價值相若每隻約需銀六兩計需銀九百八十七萬餘兩羊一百六十四萬餘隻每隻約需價銀一兩計需銀一百六十餘萬兩二共約需銀一千一百五十一萬餘兩時局如斯從何籌措現擬步兵一名除撥

給上地十畝外先給牛馬各五隻羊十隻共二十隻馬兵以上遞加通計先給十成之二均在官山牧放暫不取孳每兵每月暫給鹽菜銀九錢食糧四斗馬兵每月併照舊章暫給馬乾銀二兩四錢不令賠貼此項牛馬羊二成生生不息約計五六年後即可積足十成作爲孳生定額此後再有孳生又在官山牧放三年則皆長大臙壯歲取其利約可獲銀四五十兩加以墾地所收之糧亦可獲銀二三十兩共可獲銀六七十兩除工本外尙可餘銀五六十兩較現發勇餉每名每月三兩六錢歲得銀四十三兩二錢猶有長餘是以屯牧之利及所免之糧抵爲兵餉農民未有不爭先恐後者統計八九年後馬步銀糧料草皆可停支僅給營旗哨官辦公經費及槍礮器械軍火軍裝等費不獨新疆兵餉無須另籌卽承協省分亦可從容議減窮則思變其法無逾此者然卽此辦法先行籌給牛馬羊隻二成亦需銀二百三十萬有奇查各省協甘餉銀湖北三十三萬兩湖南一十六萬兩江西三十六萬兩除

撥解新疆賠款十萬餘兩外尙應找解銀二十五萬餘兩三省每年應解銀七十四萬餘兩三年可二百二十二萬餘兩若指作抵息假銀二百萬兩議以三年歸還本利全償冀無虧短其餘孳生經費不敷銀三十餘萬兩卽由通融勻撥尙不爲難惟此項協餉係甘新伊塔公分之款今請概抵新疆借款所有甘肅伊犁塔城應分三省之餉仍在新疆應分各省協餉內劃扣抵撥並無出入擬請

飭下兩江總督南洋大臣轉飭上海關道無論華洋款項息假二百萬兩俾作資本以期集事款到之後練一世襲兵卽裁一客勇計二三年後可以竣事從此無管官缺額之弊無兵勇饑潰之虞況以十年爲期訓練可期精熟較之徵兵內地難易判然是於營務邊防兩有裨益所有遣散客軍改練土著世襲兵情形恭摺具陳伏祈

聖鑒訓示施行

請將巴里坤等馬廠改牧片

竊新疆巴里坤濟木薩地方承平時均設有孳生馬廠逆回變亂後濟木薩城池失陷馬廠馬匹劫掠無存惟巴里坤東廠孳生馬匹雖疊被搶劫尙有遺存光緒十四年前撫劉錦棠飭查尙存大小兒騾馬四千五百餘匹咨准部覆令從光緒十六年七月分起照例取孳截至二十五年六月底止循例辦理三次均齊實存大小兒騾馬七千八百六十四匹經前撫饒應祺奏明奉到

硃批該部知道欽此欽遵在案光緒十八年前撫陶模奏請由巴里坤馬廠撥馬五百匹解交濟木薩管派兵牧放自十八年八月十四日至二十四年八月十三日止兩次限滿辦理均齊實存大小兒騾馬七百六十七匹亦經前撫饒應祺奏明奉到

硃批兵部知道欽此欽遵轉行遵照各在案此次因餉項艱難奏請變通管制籌練世襲兵所有應需牛馬羊隻爲數甚鉅擬懇天恩俯准以巴里坤濟木薩兩處孳生馬匹改作世襲兵之用稍

資散放如蒙

俞允敬請

飭部立案施行謹奏

撫標精河管改隸伊犁摺

竊惟新疆幅員周二萬里通省營伍向分五標北路鎮迪道屬地方近省各營隸巡撫本標東路鎮西哈密奇臺各營隸巴里坤鎮標南路喀什噶爾道屬地方分駐各營隸喀什噶爾提標阿克蘇道屬地方分駐各營隸阿克蘇鎮標西路伊塔道屬地方分駐各營隸伊犁鎮標界限分明督察均便惟伊塔道屬精河廳地方向設參將一員守備一員步隊一營馬隊一旗係隸巡撫本標距省千餘里平日調省合操諸多不便點驗察閱鞭長莫及查前次欽奉

上諭陸軍須歸併訓練方能得力著各該督撫各就地方形勢量更舊況合營併操畫一訓練等因自應欽遵辦理精河距伊犁只

四百餘里且伊犁鎮道均歸將軍節制若將撫屬精河一營改隸伊犁鎮就近管轄實於營務邊防均有裨益惟撫屬庫爾喀喇烏蘇營從前分哨設防與精河營定期會哨互相稽查將來精河營改隸伊犁鎮標仍應照常與庫爾喀喇烏蘇營會哨以資聯絡如蒙

俞允敬懇

飭部立案施行謹奏

會奏關內協餉減估四十萬摺

竊查關內外軍餉自光緒十一年起每年定爲四百八十萬兩戶部按年指撥山甘肅統收分解關內外三七分攤甘肅關內共分三成餉銀一百四十四萬兩內計藩庫錄營防營俸餉雜支一百一十八萬兩青海西甯甯夏涼莊各滿營俸餉二十二萬兩甘新公用轉運腳價四萬兩新疆關外共分七成餉銀三百三十六萬兩內藩庫防餉雜支二百七十九萬七千兩伊犁將軍餉銀四十

萬兩塔城滿蒙俸餉十六萬三千兩此原定關內外四百八十萬兩分起支銷之餉數也自後甘新兩省裁兵節餉屢次省出銀兩均經戶部具作封存分儲兩省藩庫良以甘新僻處西陲外逼強鄰內連藏衛蒙番雜處回漢仇深動尋衅端地方難免無事部臣等邊用意深遠迥非徒顧目前者所能計及。崧蕃目擊時艱顧念承協省分籌解匪易屢與甘藩司反覆籌商凡有可以裁併減省者無不隨時撙節固不待奉有裁減明文始行臨渴掘井也查二十三年以前各省均能掃數解清遞減封存概經戶部提充軍餉是藏之外庫實與部庫無殊惟自庚子以後兩庫續積封存又爲移緩就急搜羅罄盡而各省關欠餉積至四百萬兩之譜甘新兩省驟添借款至七十萬兩如本省籌辦學堂等事尙不在內入款屢減而出款愈增其支絀艱窘情形誠有難以言喻者年前接准部咨奏奉

諭旨飭再極力裁減等因當以甘新伊塔相去萬里商減需時曾

於二十八年估餉摺內聲明在案茲准伊犁將軍塔爾巴哈臺大臣先後酌減咨覆到甘。松蕃與。潘效蘇往返電商本擬從寬減估嗣經逐款確實核因歷年層層銳減有萬難再減之勢強於無可如何之中勉作萬不得已之舉請截至二十九年年底止仰懇天恩飭部在於甘新伊塔新舊節省封存項下統共減估四十萬兩藉紓各省關餉力原提新疆裁兵增報撥六萬兩請免再提以歸畫一自光緒三十年起請撥的款四百四十萬兩內除應解償款肅三十萬兩新疆四十萬兩共銀七十萬兩請照上屆成案仍由代解各省關就近撥解滙關交納以免周折而期迅速甘新兩省仍應自行籌款提還協飭俾清款目其餘三百七十萬兩懇恩飭部申明舊章嚴飭承協各省俯念甘新邊瘠苦區極力減估務按定限分批掃數清解其各省欠解銀兩甘肅懸釜待炊而新省改遣客勇存餉虛懸待款尤爲急切應請由部分催補解以顧邊防而維大局不勝悚惶待命之至謹奏

清單

甘肅關內外共估庫平銀四百四十萬兩內

一甘新兩省轉運公用銀四萬兩

一甘肅關內綠營勇營俸餉糧料草折廉費製造火藥軍裝倒馬價值等項銀八十八萬兩

一青海王公俸銀西甯辦事大臣甯夏涼州莊浪三滿營廉俸紙紅公費兵餉銀二十二萬兩

一關內歷年裁節暨續撥關外封存除減估外分儲甘肅藩庫銀

二十八萬兩

該藩甘肅五營綠營勇營及子項夫丁糧內照例查在此項存儲內應分造報合併聲明

一新疆巡撫提鎮協各標營俸餉暨司庫例支不敷等項銀二百二十二萬六千兩

一伊犁將軍標營滿蒙旗營俸廉餉乾軍裝器械等項銀三十四萬兩

一塔爾巴哈台參贊大臣標營滿蒙旗營俸廉餉乾軍裝器械等

項銀十三萬八千五百五十兩

一關外歷年裁節封存除減估外分儲新疆藩庫銀二十七萬五

千四百五十兩

沿邊營卡經費照案在此項封存庫內動支恐礙

古城滿營地畝已經開墾摺

竊_臣前據古城城守尉以古城滿營原撥地畝該官兵差操緊要

不能兼顧墾種呈由_臣奏請將原撥奏案撤銷奉

硃批戶部議奏欽此旋經戶部議覆應仍責成城守尉將原撥地

畝勻給兵丁耕種安定章程認真屯墾等因光緒二十九年十一

月二十九日具奏奉

旨依議欽此欽遵咨行到新當卽轉飭古城城守尉遵辦去後茲據該城守尉雙林覆稱伏查部議古城滿營原撥地畝仍應勻給兵丁耕種實於講武之中兼寓務農之意其所以爲該官兵謀生計策久長者至周且切當此時局艱難新疆各路標營尙擬改練土著興辦屯牧况滿營兵丁本係

朝廷世僕既經撥有地畝豈敢任其惡勞就逸反不督飭實力屯墾以期成效漸收惟體察情形揆度事勢實有窒礙難行者查古城滿營兵燹之後靡有孑遺現存兵額七百餘名多係由新疆各城遷併鋒鏑餘生情殊困苦撥地之初因人力經費兩絀未及屯墾故兩次奏請展緩均蒙

俞允是該兵等種地爲難情形早在

聖明洞鑒之中今若責令屯墾不惟耕作之事素所未習斷難服事田疇且農家作苦必須田廬相依該兵丁駐防滿營所撥地畝均難城數十百里不等相距爲遠尤難兼顧此窒礙難行者一也查新疆識略內載嘉慶九年前伊犁將軍松筠奏請分給八旗滿洲田畝欽奉

諭旨分給地畝係爲旗人生計起見惟新疆重地武備最爲緊要祇可專交閒散餘丁代爲耕作不當官兵親身力作等因欽此古城地處衝途形勢扼要五方雜處人類不齊彈壓巡防均關緊要

兵丁既須種地即難保其不誤差操若令閒散餘丁代耕則自遷併成營僅止千餘丁口除挑補兵額外餘丁無幾且多老弱難堪休養尙恐未暇何暇責其力田此窒礙難行者二也所撥東灣中渠大坂河西岔等處地畝向有戶民耕種前任撫臣劉錦棠原奏因戶民尙少本擬遷徙撥歸滿營嗣因滿營未及往耕不獨舊有之民未遷且有陸續新增之戶現在地多墾熟業經奇臺縣具報升科納糧永爲定額現若勻給兵丁則戶民必須遷徙事近紛擾不免有拂輿情此窒礙難行者三也滿營官兵歲需糧料雖須動撥正供然前項地畝既經升科徵糧仍可以之抵補實於

國賦無損若歸兵丁屯墾則原有額徵糧石既須開除而修渠蓋房以及牛具籽種一切屯本經費均不能不由公中籌撥將來成效尙難預期轉恐所得不償所失此窒礙難行者四也有此數難與其徒託空言有名無實不如仍請將原撥地畝奏案撤銷庶於兵民生計兩有裨益等情呈請奏咨前來臣覆查屬實合無仰懇

天恩俯准將古城滿營原撥地畝奏案撤銷免其勻給兵丁墾種以免擾累之處出自

逾格鴻施謹恭摺具陳伏祈

聖鑒訓示施行

請將古城滿營糧料按季折色摺

竊照新疆滿營自光緒十四年遷併古城經前任撫劉錦棠奏准撥給古城東灣等處地二萬餘畝以資屯種旋因差操緊要兵力無多不能兼顧屢請展緩均經奏明奉

旨允准欽遵在案查原撥之地荒置已十餘年中間有民戶墾熟之處本年九月據城守尉雙林呈請將原撥地畝奏案撤銷經奏明滿營兵需糧料均由奇臺各處照數撥供請將原撥地畝撤銷歸縣招戶承墾升科在案所有該營官兵家口食糧馬料本應遵照向章每年支領本色一季折色三季以符定制惟近年糧價昂貴採買爲難擬請變通辦理少支折色多支本色由附近各縣

攤撥供支以示體恤而免賠累雖公家不無虧貼而兵丁受益良多核計滿營官兵每年春夏冬三季應需本色京斗糧料一萬四千九百一十二石三斗六升八合八勺五抄據城守尉雙林呈請定撥等情 飭署布政使李滋森分別定攤糧數由孚遠縣撥糧四千石阜康縣撥糧二千石昌吉縣撥糧二千石呼圖壁縣丞撥糧一千石以上四處共撥糧九千石脚糧均照伊犁滿營撥糧章程每糧一石每百里亦按減半七升五合開支其餘不敷五千九百一十三石三斗六升八合六勺五抄概由奇臺縣如數撥給該廳近在同城毋庸開支脚糧由布政司轉飭各屬遵照按年照數撥支給領具報其每年秋季分仍照舊章發給折色銀兩所有古城滿營官兵歲需糧料擬請按三季本色一季折色支給以免賠累各緣由理合仰懇

天恩飭部立案施行謹奏

新疆圖志卷一百六

奏議十六

國朝 宣大化

請借款修通東西鐵路以保西域而固全局摺片

遵籌撫恤商民請願抽捐歸墊摺

請改中俄通商局爲交涉總分局片

邊省欸絀人稀宜先其所急以固根本摺

請開荒辦礦工藝牧養片

大員玩視馬政查辦摺

衛隊百名餉章報銷冊片

巡警勸業兩道請緩設片

開闢利源以實邊圉摺

議覆伊新全局摺片

李故標統學文請卹摺

核覆喀烏司牙孜保案請仍照原議給獎摺

參張培愷片

審判廳不能審結由提法使就近提審片

巴里坤馬廠改設馬政局陳明辦法摺

請設于闐縣屬卡牆巡檢員缺摺

添招馬步軍隊備補防營空額片

代奏提學使開缺回籍摺

請借款修通東西鐵路以保西域而固全局摺

奏爲時局貼危急宜籌款修通東西鐵路以保西域而固全局恭摺密陳仰祈

聖鑒事竊維中國大勢數十年來注重海防今則鐵路漸通勢又趨重於邊防邊防以東西兩首爲最急東則日俄西則英俄東三省主權漸失宜以內蒙古之東四盟外蒙古之車臣汗爲最先著手之地及早認真經營以防西侵之路則京師之後路固若英俄相持於喀什噶爾西南邊境鐵路既通進無所得勢必旁及現聞

英從大吉嶺開山修路志在先通拉薩若前藏有失則憑高臨下
勢將及於青海荒曠無人直抵西甯則甘省之甘涼肅安四郡路
僅一線勢將中絕新疆一省孤懸西北更隔塞不通俄之虎視眈
眈刻日勘定疴母斯至塔什干路線現皆傍我西邊又豈讓人先
著此最危急之勢何忍緘默不言今欲經營西域以捍中原自係
上策惟窮荒萬里交通不便無款無民從何措手外人闢土開疆
皆恃鐵路爲先導無已則有請先修陝甘新三省鐵路直接俄路
於佈擇將來東西大通路近天暖環球旣以此路爲樞紐人貨自
無不出於其途南洋之航路西畢利亞之鐵路其利權皆可安坐
而奪之數十年之所失無難取償於一旦而我之經營甘新藏青
四省朝發夕至遷民實塞壽款練兵自皆操縱裕如爲今日計欲
保全中國領土轉弱爲強急莫急於此矣蓋泰西之東來中國也
德法英美以次漸遠而南北美爲尤遠乘汽船繞南大洋經錫蘭
島則偏於南乘汽車繞北大陸至東三省又偏於北當大地南北

之衝而握東西綰轂者厥惟今之新疆一省新疆據地球之中心點歐亞大局繫於地中海惟新疆形勢以陸制水可與之爭雄荒曠牧工四大利益加乎環球猶其末焉者也我

國欲提挈全球之綱維開闢中西之門戶當撮合國力急成陝甘新鐵路直接俄疆扼絕利權高據形勝卽英之蘇彝斯河無以愈之但途長費鉅以萬里計約略估算需款總在一萬四千餘萬兩值此時艱財盡從何籌此鉅貲如能於新政中擇其不急之務姑令緩辦數年騰出鉅款移緩就急先成此路自可權自我操否則惟有借美國之款以現有之路利保息以擬辦之鐵路作押將來路成款還彼亦無從干預且美國僻遠勢隔情通重在商務素敦交誼似亦別無可虞如能上下一氣內外一心力闢羣議毅然爲之挈全國之力以成此偉業將來轉貧爲富易弱而強之基胥在是矣原自受

命撫新出關以來卽留心察看目覩甘新空虛情形及戈壁險遠

地勢遇事萬難應急並密訪英俄近來布置日事侵陵日夜籌思非此不足以圖挽救謹恭摺密陳伏乞

皇上聖鑒訓示謹奏

宣統三年五月十五日

又片

再現奉

上諭天下幹路均歸國有定爲政策此項最大幹路自應歸郵傳部主持籌畫該大臣盛宣懷等受

國厚恩其識力又足以幹事可否即責成該大臣等借款監修將來保息押款均易商籌如有需及疆臣之處。過西安蘭州時曾與督^臣長庚撫^臣恩壽面商意見相同均願協力互助以期早日

成功至路線白潼關長安沿渭河而上至渭源狄道過山至蘭州山路三百餘里由蘭州渡黃順溝出北山至古浪境亦止三百餘里涼州以西一片平原無高山大川戈壁沙石墊路最宜較之邠涇隴阪崇山峻嶺所省尤多至新疆迪化以東路多平坦或由迪

化分支西至伊犁南通喀什或由吐魯番分途一出迪化伊犁一
由焉耆疏勒以接俄路崑崙高峻頗費經營統由部臣派員勘定
路線相勢辦理以期迅速近來游人口多泰西各國皆注目於此
以爲新疆地扼中外咽喉勢居建瓴寶藏未興若經理得法軍事
商務均能高執牛耳鐵路遲久不修必有出而要求者設入他人
之手禍更不堪設想日本政府前派武員日野強調查二年著書
四冊於新省禍福利害言之極詳深恐英俄因此忿爭亦如俄日
之在東三省也持危扶顛止有速修鐵路實邊屯兵之一法旁觀
代籌言之諄諄合再附片密陳伏乞

聖鑒謹奏

遵籌撫恤商民請願抽捐歸墊摺

奏爲遵籌撫恤感出商民請願抽捐歸墊恭摺具陳仰祈

聖鑒事竊查接管卷內新省於宣統二年七月初六日夜有猝起
游匪王高陞等滋援商民肆行焚劫一案當時延燒狀況暨後來

捕匪情形迭經前撫 聯魁先後恭電陳奏嗣於七月二十九日
承准軍機處電開奉

旨新疆匪徒滋擾延禍商民著卽妥籌撫恤等因欽此當經聯魁
督同司道悉力籌維於無可爲力之中設法騰挪各按被災輕重
酌定撫恤多寡計先後發給災商昇聚永等一百七十戶恤銀三
十八萬四千六百八十四兩又修蓋被焚官房九千八百十二兩
計共用銀三十九萬四千五百兩內經閩省文武各員捐助銀五
萬九千一百零二兩概歸此項支發抵除計實在用銀三十三萬
五千三百九十八兩均暫由藩庫墊發經各災商全數具領在案
皇仁遠播懽洽邊庭旋據八幫商首周恒彬等以庫帑正絀不忍
偏累公家合詞稟懇願自宣統三年正月起由百貨統稅項下每
稅銀一兩加收銀二錢五分以爲歸補此款之用一俟補足原墊
卽時停止等情稟由司道等詳經聯魁往返電商度支部及前故
撫 何彥昇均經許可因日久未及奏請立案以致前項恤款早

經發清而商民請願加抽二分五釐稅項迄未徵收。到任後始據司道冊詳當傳該商首等面詢均無異詞遂飭令各稅局將此項商民請願加收捐款自本年六月初一日起一律照徵俟墊款還完卽行截止應請

飭下度支部立案以便稽核所有前撫

臣聯魁遵

旨籌辦撫恤及商民情願抽捐歸款緣由除分咨外理合恭摺具陳伏乞

皇上聖鑒訓示謹奏

宣統三年五月二十七日

請改中俄通商局爲交涉總分局片

再查新疆自設治後省城暨各商埠先後設立中俄通商局辦理交涉事宜當時沿疆緊接俄壤交涉亦惟俄爲最多故通商局繫以中俄字樣近來全疆交涉逐漸增繁各國游歷官商絡繹於途駐喀什噶爾英員已改爲總領事今昔情形既異外人往來日多常常以此藉口接待頗形不便擬將該局釐正名實省城中俄局

改爲交涉總局責成司道督飭局員妥慎辦理其商埠各局除塔城一處係參贊大臣兼管應由該大臣酌辦所有喀什噶爾伊犁兩處均擬飭道改爲交涉分局俾昭畫一以資聯絡除咨部外謹會同伊犁將軍_臣廣福陝甘總督_臣長庚附片具奏伏乞

聖鑒訓示謹奏

邊省款絀人稀宜先其所急以固根本摺

奏爲邊省款絀人稀強鄰逼處諸部易離極宜先其所急以固根本餘俟逐漸推及恭摺具陳仰祈

聖鑒事竊_臣伏讀上年十月十一日

上諭其有邊遠省分未經設治及甫經設治人民稀少地方與腹地情形顯有不同應辦各事有不得不分別先後緩急者准由該督撫等據實奏明請

旨裁奪總不使於憲政前途稍有窒礙等因欽此仰見我

皇上明燭萬里無微不照欽佩莫名原自當欽遵

諭旨審勢度時切實籌辦不敢粉飾誇張於前敷衍塞責於後致負名不副實遺誤事機之咎謹將應辦各事分別先後緩急敬爲我

皇上質直陳之查新疆地方面積五百五十一萬方里有奇而漢民不滿三十萬加以旗哈蒙回七十萬南路纏民一百萬通計不過二百萬老弱婦孺均算在內每兩方里半不合一人較之內省人稠地方每方里三百人計之不到七百分之一府廳州縣縣丞止有四十三缺荒涼僻遠可想而知况漢民連客籍僅三十萬人此外各部皆榛狉初開並不通漢文漢語而款項之奇絀更不待言歲入協餉二百四十萬兩去歲實解到新者一百四十八萬餘兩本省正雜各款一百四十餘萬兩兩共二百八十餘萬兩用款已有三百八十餘萬之多若照預算估冊宣統四年尙須加款一百萬兩各省協餉帶欠日多如此鉅虧從何籌補學堂一項爲造

就人才之地本不敢視爲緩圖但纏回蒙哈宗教不同語言文字
又不同強迫其子弟入我學堂其父兄不以爲善反以爲苦多有
集貲雇覓丐者之子以爲充差之地學司以職掌所在嚴飭所屬
將各種學堂勒限成立圖書器具必依式完備課程表冊必按次
編牘地既相去遼遠勢須寄耳目於視學而視學員賢否不一或
因緣假借遂以愛憎定考成各郡縣吏緣此得罪記過參革者已
有三十餘員名如烏什廳同知方遄奇台縣知縣楊方熾等著名
循良賢吏皆由視學員一言罷職未免可惜各屬以功令褻嚴教
過不暇亦遂不計民生之疾苦財力之絀盈專以凌轢強迫爲事
而盡出敷衍遷就之途一屬所立學堂自十餘處至二十餘處但
期速報成立不問人數多寡效果有無頃據喀什噶爾道袁鴻祐
稟稱一屬學堂之費動至數萬金概須籌之本地民間而所選學
童又盡屬貧人之子多由該頭目雇替而來殷實子弟實無肯入
學堂者每一學童由各戶攤費五十兩以給其家各鄉約之藉公

勒索尙不止此纏民宗教各別終以讀書爲苦差學費攤捐無已
又以興學爲虐政民力既屬難堪民氣遂致囂張于聞疏附各縣
有售產逃入俄國者有開寺聚衆呼天者屢與英俄領事接見皆
言各屬辦學過於操切英領事則謂中民迫於興學欲改投英籍
皆未收納俄領事則謂疏附接界安集延部纏民雖隸俄國並未
強以俄學現喀什阿克蘇地方如此不靖皆因華官迫令纏回入
學抽收辦學捐費英領事曾電達該公使照會外部電咨前撫
行查在案該領事等目擊學務纏民怨苦情形頗可危懼深恐鬱
而必發致受池魚之累故皆陰有戒心而預爲是言等語伏查邊
地興學如實在窒礙難行前經學部奏明准仿照外洋治邊之策
另籌特別變通辦法有案在

朝廷既未執一律以相繩在邊省又何妨變通以盡利現擬飭該
道等切實核辦按照缺分繁簡酌定學費多寡大缺籌款以一萬
五六千兩爲準次缺八千至一萬兩爲準以下則比類籌措量力

推廣堂數多學徒少者照六十名定額核實歸併以節虛堂糜費
簡易識字學塾附習漢語學堂鄉曲人少費多城關鄉鎮八柵及
禮拜公所皆有纏民私塾紳商子弟無不入學纏文者將應設鄉
鎮學塾併入纏塾加派教員限半日專習識字漢語各課半日仍
習纏文漢纏並教由纏文輸入漢文較盡棄其學而學我者爲易
入染濡日久課日程功必知中學爲有用庶可收教育普及之效
亦稍省創建學堂之資此變通南疆學堂之辦法也至於北疆學
堂亦苦人少多有招募陝甘學生來新肄業於造就本省人才宗
旨多不相符擬飭司道等按照本地人數財力核實辦理不必以
多爲美專驚虛名迄無實效伊塔等屬漢民較少蒙哈各部不通
言語游牧爲生居無定所學堂恐難徧及擬飭該道府因地制宜
相機勸辦期於實事有裨此變通北疆學堂之辦法也警務保全
地方治安亦刻不容緩之事惟新疆設治未久能辦巡警者不過
四十餘城其餘鄉鎮過百家者寥寥無幾地廣人稀常百里或數

百里無人巡警既無從辦起款項亦難自措籌當經前撫臣聯魁奏明將改編巡防隊五十九營中抽出六營分作全省巡警兵遵照部章按年籌備暫顧目前責成並未計及久遠現經陸軍部駁斥軍餉不准挪作別用須自另籌的款宣統三年底卽須截止以如此荒涼省分焉能立籌鉅款巡警關係重要又難因噎廢食已飭各屬先期籌畫當此筋疲力盡人心浮動之時究能籌出若干現實茫無把握如果不能籌足原數警兵卽須酌裁尙祈垂念邊民痛苦

飭部稍予通融審判爲治外法權通商各國皆以爲重惟新疆孤懸絕塞常駐此間者止有英俄兩國領事俄於交還伊犁之初已獲有最優利權貨物既不納稅商民又得自由購地建房經商游牧向不歸中國管轄已數十年於茲伊犁塔城喀什莎車等處皆有英俄兩國籍民歷經前撫臣查報外部有案現聞各埠審判開庭後遇有交涉案件領事須同堂會審以新省多數無外交智識

之人使其日與外人同堂治事非畏蕙以傷

國體卽債事以失邦交。恐邊庭之釁未必不由此而起歲需百餘萬金用以爲賈禍之媒新疆虧款纍纍實無從籌此鉅貲省城審判檢察兩廳業經成立應請開庭試辦餘俟籌有的款再行相機擴充邊遠省分與內地情形不同早邀

聖明洞鑒無庸瑣屑贅陳選舉自治皆爲憲法緊要之端惟新疆向無紳士亦乏土著不惟無可選舉之人亦並無選舉人之人前撫聯魁迫於功令勉強設立諮議局以本省候補府廳州縣充當議長議員以行政官而兼議事之權於原設諮議局之義名實實不相符亦斷無敢議長官之非此誠徒費無益之舉土著漢民無多客籍多係經商以三十萬衆分住天山南北府州縣城附城數處尙可設局研究自治其餘蒙哈纏回言語不通間有頭目鄉約借通情事往往假借官吏魚肉其衆此外別無所長勢難使其自治擬令先通語言文字稍明事理情誼接洽無意外虞方敢議

及此事陸軍向以徵兵爲宗旨新疆土著人少纏回從不使之屬
雜兵間往往從陝甘內省招來充數一人之費動需數十百金苟
可將就不敢十分認真以致軍政之腐敗甚有過於防管者現擬
逐漸整頓先從將領起以次及於兵目藉收綱舉目張之益伏查
外洋之治國治內與治外不同我

朝憲法仿照日本日本治國內之制不以之治朝鮮臺灣治各府
縣郡之制又不以之治北海道豈有畸輕畸重哉亦因地制宜不
得不然耳夫中國之有新疆亦猶日本之有北海道也其緊要治
法有三大抵以鐵路爲命脈以植民爲政策以實業爲急務人聚
地辟貨財充裕以次及於軍政學務巡警審判選舉自治各要政
自不難款集事舉完善立臻否則不務根本專事虛名不惟於事
無裨必致官民俱困窮極變生事所恒有再有趁勢收我人心者
從而煽誘其間大局卽不堪設想矣 荷蒙

深恩畀以極邊重寄苟有利于

國家不敢稍自引避新疆邊遠絕塞情形實與內地不同合無仰懇

天恩俯念邊患日深不復以腹省程限相繩俾得先其所急逐漸籌布則邊疆幸甚大局幸甚理合具摺直陳伏乞

皇上聖鑒訓示謹奏

宣統三年六月初六日

請開荒辦礦工藝牧養片

再新疆年來籌辦新政民力維艱狡黠者流常有煽誘中民嗾入俄籍免出捐費此不過聳纏愚之聽文明大國未必有此政策然民心搖惑若再一味苛派不知加意撫綏俄部纏回皆其族類爲淵醵魚勢所必至前接伊塔道潘震密函各項派捐似宜少緩以定人心亦心知其然不得不稍予遷就現辦各事皆以利民用固民心爲本如開荒辦礦工藝牧養爲新疆之大利最有益於民生。初入新境即從事於此查星星峽爲新疆東邊西距省城二十四站中多戈壁不產草木每百數里一站站僅土屋數間糧草

皆無行人一多水不敷用且有鹹苦不堪入口者奇冷酷熱氣候無常人馬傷亡多在此處白骨狼籍閱之惻然。留心察看金礦煤礦頗多苦於無人無水棄之如遺凡有成片茂草下皆有泉泉亦不過兩丈深現於兩站中間有泉無人之處用石標記鑿井蓋房招人承住有土則戽水種糧兼設旅館無則專事開店俾行旅尖宿有所以通後路藉爲將來開礦地步哈密兩邊荒地各百有餘里土沃草肥水泉深僅丈餘邊地常數年不雨土人又懶於掘井專靠雪山融流灌地無水卽無人居現與哈密札薩克回子親王沙木胡索特商酌由伊督工雇用纏民先從北山八門洞唐時舊渠塘開通南北幹渠以灌哈東黃蘆岡百餘里之地再由五道溝開挖坎并引水過灘以灌哈西百餘里之地用款不過萬金彼此各任一半按年由墾戶攤還漢民纏民各分渠水一半以資灌溉足養十數萬人後路人民殷富省會亦可無憂沙親王長於開渠任事又勇當可成功再西由頭堡至古城十數站亦皆戈壁灘

有泉則加濬寬深無水則鑿井蓋房均飭都善奇臺等縣分任辦理設法招墾阜康一縣幅員數百里居民四千人博克達山上有海子周四十餘里水深無際已飭該縣鑿洞引水灌地必多此外如迪化之旱拔湖綏來之大河沿等處水多地廣亦委員會同地方官勘度辦理並通飭各屬查報荒地墊款開渠有渠則地皆可墾至如金銀銅鐵鉛煤石油脂玉各礦甚多亦擬招人開採以開利源皮毛極夥工藝可興牛馬羊羣獲利速厚容卽逐漸整飭如果交通便利不出十年可期富庶各項新政方可次第辦成否則專恃鄰省之協濟不闢本地之財源設有變端坐困何及別事皆徒費經營矣臣才疏憂深不覺言之切直謹附片陳明伏乞

聖鑒訓示謹奏

大員玩視馬政查辦摺

奏爲總兵大員玩視馬政撤任查辦另籌整頓恭摺具陳仰祈

聖鑒事竊馬政關係軍備近年迭經陸軍部通行調查銳意整頓

不啻三令五申臣奉

命出關以新疆原係產馬區域而巴里坤牧廠尤巨惟聞歷年辦理未盡得法致牧政迄無起色當經電飭著巴里坤鎮總兵李克常囑於大道經過地方將馬羣就近擇一水草便處暫時牧放俾得順道察閱以便酌籌改良詎四月間臣抵哈密該鎮並未遵辦僅於途次面遞手摺一扣聲稱現存馬匹較接收時點驗之數短少五百九十一匹臣以其中不無疑竇因行次無案可稽未加深究抵任後檢查前案悉該鎮係上年十二月底始申據著古城左營遊擊王長發摺報接收前任遊擊李捷榮移交前項孳生官馬大小兒騾驢馬五千一百四匹牘內曾聲明眼同點驗並有印收在案相距未及四月何至短少數百匹之多是該鎮有心朦混情弊顯然正須試辦軍馬似此任意玩視若不切實查辦何以肅牧政而儆效尤現已將該署鎮撤任札委縣丞曾坤楨同知銜武衛軍畢業生曹用愚會同王長發李捷榮前往逐細查驗俟稟復

至日再行察酌情形另訂章程

奏咨辦理期收實效除咨部並揀員接署鎮篆外謹會同伊犁將軍_臣廣福陝甘總督_臣長庚喀什噶爾提督_臣焦大聚恭摺具陳伏乞

皇上聖鑒訓示謹奏

宣統三年六月十七日

衛隊百名餉章報銷冊片

再新疆軍政必須整頓中又多難前經_臣面商軍諮處蒙准招練

衛隊百名隨行藉資調遣用作模範並商允陸軍部發給小口徑毛瑟槍百桿刺刀帶盒俱全每槍配子彈四百顆各項裝服由_臣

照章製備上年十二月二十九日招齊成隊計設教練隊官一員

隊長二員書記長一員兵分十棚每棚什長一名火夫一名所需

月餉隊官六十兩隊長每員三十兩書記長十六兩什長每名四

兩八錢正兵每名四兩五錢火夫每名三兩三錢另共柴價銀二

十八兩什長正兵月餉外各加津貼銀一兩五錢因萬里長征非

此不能敷用且新省地廣人稀銀賤物貴每一工人日需銀四五錢月可獲銀十餘兩兵餉僅四兩餘難免缺望稍加整飭則思去而之他略涉寬鬆則又無所不至營規之壞日甚一日以致釀成去秋聚衆焚劫之禍。到任設法整理不得不稍事變通屢經商蒙軍諮處陸軍部許准並函達度支部聲明到任另具公牘請訓時復面陳在案所有招練前項衛隊用款暨從本年正月初一日起支薪餉並沿途雜支各項相應仰懇

天恩俯准敕部備案之併作正開銷除開單造冊分咨查照外謹附片具

奏伏乞

聖鑒訓示施行謹奏

宣統三年六月十七日

巡警勸業兩道請緩設片

再查接管卷內迭准部咨以巡警勸業兩道員缺關係緊要催令及早籌設本應查照辦理惟新省地瘠人稀設官分職向從簡便

近年財力益絀一切新政祇能酌量籌辦萬難遽求完備卽提法使一缺原係獨立機關現仍暫由鎮迪道兼攝無力添設專官艱窘可想而知竊計全省警政業有警務公所以爲總匯實業一項正督飭司道確切調查設法推廣凡有可興之利無不竭力圖維期有實濟合無仰懇

天恩俯念邊省瘠苦無力添官准將巡警勸業兩道暫從緩議俟財力稍裕再察酌情形

奏請添設除咨部外謹附片具陳伏乞

聖鑒訓示謹奏

宣統三年六月十七日

開闢利源以實邊圉摺

奏爲新省土廣民稀財賦支絀請設法開闢利源以實邊圉恭摺仰祈

聖鑒事竊新疆居西北上游地大物淵自古爲農牧之國其間皮革旃罽之材金玉銅鐵丹砂之藏瑰瑋繁富不可殫紀到任以

來詳加考查竊見新省貧瘠之原由於地荒地荒由於人少卽如官荒一宗自迪化以西精河以東草湖葦灘彌望無慮千萬頃而南疆及東路村落蕭條荒涼滿目大致相同雖有沃土棄同石田屯政不修利何由開實惜之現與司道籌議墊發庫款疏濬溝渠以興水利盡地力無如工費浩繁庫儲奇絀限於財力未能擴充欲仿照東三省辦法曾招集南洋華僑設立公司墾礦兼營雖各認有巨股而道途遼遠曠日需時又非急切所能收效。昕夕焦慮求所爲疏通提倡之方以期逐漸經營推行盡利查奉天大凌河天一公司興辦墾牧成效昭著新疆商民固陋風氣未開驟難啟導及此擬略仿其意先飭在新文武各員有能獨力開荒千頃至數千頃或獨力或集股創辦大公司資本數萬至數十萬以上無論墾牧礦工確有成績者均准專摺奏請分別獎叙並破除服官省分不准置買產業之例以資鼓勵而廣招徠。爲興利實邊起見合無仰懇

天恩俯念邊陲瘠苦利源難闢准予變通辦理如蒙

俞允再由^臣督同司道體察情形擬訂辦法及獎勵章程奏咨立案俾昭慎重所有請設法開闢利源以實邊圉各緣由理合恭摺具陳伏乞

皇上聖鑒訓示謹奏

宣統三年閏六月初一日

議覆伊新全局摺

奏爲遵

旨籌議伊新全局恭摺覆陳仰祈

聖鑒事竊查宣統二年十一月二十八日承准內閣會議政務處奏交馬亮伊新設官統治條陳暨長庚升允聯魁等電奏說帖請旨飭下一併詳籌議覆等因恭錄咨行前來^臣履新以後卽詳加調查覈閱馬亮長庚原摺宗旨大略相同其扼要在改設總督以一事權一語升允聯魁所論則主持甘新聯爲一氣以關內控制關外而無取乎更張要皆持之有故言之成理^臣周諮博採揆勢

準情折衷其說竊謂其中有宜建新者亦有間宜循舊者謹將籌議大端敬爲我

皇上陳之臣聞立國之道有三曰土地曰人民曰政事民隨地分而政因民立此古今不易之通義也新疆當雍乾之際建侯行師立軍府於伊犁百餘年間相承未改同光回亂內訌外侮沓至紛乘軍興初定始變置行省迄今三十餘年規模粗就行政區域誠未若內地之整齊故自表面視之則巡撫有統治全疆之責而自內容言之則將軍參贊隱有專理蒙哈部落之權人民既判土地遂分而政事亦因之阻格遂有一割不可復合之勢正不僅如長庚所言文武有兩姑爲婦之難地方生政出多門之弊已也夫使畫分疆理明定權限俾令責有專歸在勢未爲不可無如內政則練兵察吏未可紛歧外事則交涉通商深虞滅裂况伊塔沿邊延袤二千餘里處處與俄屬毗連抵隙蹈瑕已非一日公忠協力猶懼弗濟若我先披分其勢必至爲人所乘故馬亮長庚均兢兢以

意見掣肘爲慮老謀深算具有苦衷卽如到任以來提議整理
墾牧各政因蒙哈游牧地方多屬將軍統轄不免先自懷越俎之
嫌亦實有窒礙難行之處可知畛域之見起於習慣而中於人心
事地使然牢不可破迨施之事實隔閡尤多長庚久習邊事所陳
六宜各節誠爲老成謀國之言確實可行惟查新疆分省始於
光緒九年大學士左宗棠原議督撫並設嗣撫劉錦棠以新疆
孤懸絕域懼無後援請統隸甘肅作爲兼轄省分雖今昔形勢微
有不同而所資以爲應援者則未嘗少異升允聯魁所稱新疆以
甘肅爲堂與甘肅以新疆爲藩籬等語原屬不刊之論故規時
撫勢權衡於二說之間竊以爲不設總督則一國三公雖有賢者
不能自行其志而外患孔棘內政不修決非所以圖自立然改設
之後必將離甘肅而獨立又恐徵兵籌餉呼應不靈亦非所以謀
萬全萬不獲已於變通舊制之中權爲兩利俱存之道擬請

旨將伊犁將軍塔城參贊大臣甘肅新疆巡撫三缺一併裁撤仿

照

盛京改設新疆總督一員兼管巡撫事務仍以迪化爲治所旗漢並用凡滿蒙旗務請查照馬亮原議裁去領隊各員酌留伊犁塔爾巴哈台副都統兩缺均歸總督節制以一事權而專責成其甘肅兩省關繫除總督體制較崇不便軒輊外自提鎮司道以下文武各員應請仍照舊章兼隸甘督轄屬以示聯絡一氣藉收輔車唇齒之益或疑兩大無相臨之權各官無兩屬之例不知兩江總督有時閩粵兼籌浙江一省原屬閩浙總督而外交大政亦嘗秉承江督核辦東三省原屬直督統治範圍自設總督後仍多會商事宜山海關道一缺且歸直督補署新疆地處邊陲自可比例變通既克收統一之功仍不失聲援之助實於吏治財政兵事邊情均屬大有裨益至於改建經費原與開創不同况裁三併一變置者少而節省者多通盤覈計自當有盈無絀惟新疆爲

神京之右臂西北之屏蔽當茲改更之時百端待理任大責重擔

負匪輕如。望淺才疏萬難膺此艱鉅如蒙

俞允俯采芻議合無仰懇

天恩准與將軍參贊併予裁撤

另簡重臣以資治理。不勝犬馬屏營之至至馬亮所陳裁兵節
餉籌款練軍各節多係統治以後興革之事業經升允等查議應
俟改設總督後另案核辦暫可無庸條覆另設南疆巡撫一層現
值人民無多庫款奇絀應從緩議所有遵

旨籌議伊新全局各緣由。謹就邊地情形近來時勢切實計畫
不敢稍涉偏私貽誤大局理合恭摺覆陳是否有當伏乞

皇上聖鑒訓示施行謹奏

宣統三年閏
六月初九日

又片

再伊犁逼近俄疆自立約互市以來中外雜處交涉繁多保邦輯
鄰胥關緊要如改制之後伊塔兵備道一缺擬請

賞加交涉使銜兼管調遣防營俾重事權而資鎮懾塔城商埠衝

繁不減伊犁原設直隸廳同知一缺擬升爲知府兼理事銜庶於
應付交涉管理旗民均有裨益至應否增設州縣仍俟改定官制
再行妥籌辦理其裁缺人員久在邊庭歷受艱苦並擬仰懇
天恩酌量錄用俾得自効出自

逾格鴻慈謹附片陳明伏乞

聖鑒訓示謹奏

宣統三年閏
六月初九日

李故標統學文請卹摺

奏爲陸軍軍標統積勞病故懇

恩優卹恭摺仰祈

聖鑒事竊據新疆陸軍協統補用副將王佩蘭詳稱已故陸軍步
標統帶兼帶第一營總兵銜補用副將李學文安徽阜陽縣人於
同治九年投効西征馬隊轉戰甘肅新疆等省克復肅州烏魯木
齊瑪納斯吐魯番各城並歷次剿平邊寇積功洵保留安徽補用
參將

賞魁勇巴圖魯名號光緒十八年改留新疆保補缺後副將十九年委帶定邊六旗馬隊防剿西甯竄匪迭次獲勝二十四年奉委募勇隨營赴京帶武衛中軍右營駐紮

南苑二十六年帶隊隨

扈到陝二十七年恭送

變輿回京以護衛出力

賞加總兵銜旋回新疆署阿克蘇鎮左營游擊邊防營伍均能實力整飭勞怨不辭宣統元年九月委帶陸軍步隊第一營二年八月委充步工各隊標統兼帶原隊該員血性勇敢堅忍耐戰治軍尤極嚴明新疆土著無多新舊軍隊多從關內招來訓練乏人迄無起色該員接任陸軍管帶毅然以整飭管規自任訓練不厭周詳法令弗少寬假到營數月弁兵漸知紀律不似從前之弛慢其升充標統正省城匪亂初定人心驚惶漏網餘匪不免暗地糾結希圖復逞該員嚴申號令晝夜巡防不遺餘力匪類從此潛消地

方賴以靖謐宣統三年三月積勞觸發舊傷醫治罔效十九日在營病故呻吟之際猶以軍事爲念並無一語及私該員秉性廉介身後蕭條眷柩回籍尙多爲難除請照章加給薪銀外現正設法妥爲料理等情造具履歷事實詳請懇

恩優卹前來查已故陸軍標統李學文早歲從戎戰功卓著庚子隨

扈備歷艱辛嗣在新疆統帶陸軍承弛懈之餘認真整頓紀律一新正資得力乃因傷發病故殊堪惋惜從前軍營立功後積勞病故人員歷經

奏卹有案今李學文事同一律合無仰懇

天恩俯准敕部將已故陸軍標統總兵銜補用副將李學文照軍營立功後積勞病故例從優議卹以彰勞肆而資激勵出自逾格鴻慈除將履歷事實清冊咨部外謹會同陝甘督長庚恭摺具陳伏乞

皇上聖鑒訓示謹奏

宣統三年閏六月初一日

核覆喀烏司牙孜保案請仍照原議給獎摺

奏爲覆核南路辦結中俄積案在事出力員弁原保尙無冒濫仍請照擬給獎恭摺仰祈

聖鑒事竊准前撫臣聯魁移交接管卷內上年十月奏報南路會辦中俄積案事竣請獎在事員弁一摺宣統三年二月十七日陸軍部遞回原摺奉

硃批著袁大化核覆具奏欽此竊查新疆自伊塔以至烏喀沿邊皆接俄壤鄰邦之軌綫日廓即邊界之事務日繁司牙孜者譯言清理積案也自光緒十三年奏定每屆三年中俄派員會辦一次不拘中俄法律訂立條約秉公斷結誠交涉與治邊直捷了當之舉辦法以精敏得體爲主上年喀什於托雲地方兩國開司牙孜會經該道袁鴻祐詳派署洛浦縣知縣准補葉城縣知縣張應選會同俄國司牙孜長普洛科坡福進山辦理五月初一日起至二

十六日結案已過大半山峽重瘴兵民多病俄員普洛科坡福照
商張應選先行散會出山未結各案由張應選帶回喀什會同俄
領事索科福派員於六月底一律訊結共計新舊積案二千八百
八十七起兩國原被各人證尙能折服蓋非約章邊情素所研究
諳熟之員不足供此役亦非習慣災風山瘴艱苦不懈之員不足
勝此任查原奏請獎各銜名悉據喀什噶爾道袁鴻祐就近考核
勞績最著之員至於員數則喀什爲援案續行烏什爲初次創辦
兩處併案彙獎文武共九員例以上屆烏什不在內喀什已准獎
九員成案尙屬有減無增雖原奏內張應選一員現已另案開缺
另補而辦理此次積案確係最爲出力人員似應仍請獎叙庶於
邊務足資鼓勵 到任後接閱卷牘訪察情形前撫 聯魁原請
保獎各員尙無冒濫之處應懇

天恩敕部仍照原議給獎至用過各經費業已飭司照章在善後
款內動支造報在案亦皆實用實銷並無獎資所有核覆南疆辦

結中俄積案出力員弁仍請照擬獎叙各緣由理合恭摺具陳伏乞

皇上聖鑒訓示謹奏

宣統三年閏六月二十二日

參張培愷片

再查新疆高等檢察廳檢察長張培愷閏月十九日夜同迪化府地方審判廳廳長樊耀南檢察廳檢察長賈晉及省立中學堂教員恆隆崇文並已革于闐縣安允升之子安履泰已革莎車府知府聯恩卽用知縣鄭聯鵬候補知縣謝祖燿等資夜在省城東門外挾妓聚飲醉後張培愷與安履泰口角爭毆經衆勸散張培愷回至東門叫開鎖鑰偶有齟齬毆打守門員弁回廳復帶警兵數名挾印來署叩門聲稱被人毆辱請參辦。以時過夜半未與開門延見該檢察長旋即回去未及天明撫藩臬三署均經聞報次早復來。署索見當飭藩學臬三司查明請酌辦前來。查張培愷係司法大員應如何束身自愛乃資夜狎妓飲酒已干例

禁酒後復口角撕毆尤屬不成體統散後閨門鬧署雖由醉後所爲究屬目無法紀應請將花翎知府銜候補直隸州署理高等檢察廳檢察長張培愷卽予革職以示懲儆安履泰從寬驅逐回籍至地方審判廳廳長樊耀南檢察廳檢察長賈晉皆係現任職官雖未滋鬧同土娼狎飲亦屬不知檢束均請交部議處教員恆隆崇文有教育師表之責飭由提學使撤差驅逐知縣鄭聯鵬謝祖燿隨從遊蕩飭由布政使從寬各記大過三次前莎車府知府聯恩已經另案革職應請毋庸置議守門員弁已飭城守協副將分別撤差另換所有土娼已飭迪化府縣查明遞解驅逐出境是否有當伏乞

聖鑒訓示謹奏

宣統三年閏六月十二日

審判廳不能審結由提法使就近提審片

再新疆人才缺乏司法行政承長多不及格定章民事刑事須由地方審判呈訴不能判結再赴高等審判呈訴如高等審判亦不

能判結須赴京師大理院呈訴新省去京萬里窮民無此財力以至積案纍纍無可控告。每次出門返署攔輿控訴者總有數十起伏查遼遠省分情形均與內地不同合無仰懇

天恩俯念邊氓疾苦飭部設法通融遇有各處審判廳不能審結之案准由提法使就近提審以清積案而伸冤抑實於邊庭刑獄有益謹附片陳明伏乞

聖鑒訓示謹奏

宣統三年四月二十二日

巴里坤馬廠改設馬政局陳明辦法摺

奏爲巴里坤馬廠改良辦法繕具清單恭摺仰祈

聖鑒事竊新疆馬政弊深巴里坤一廠。出關時欲順道察閱馬羣該鎮節詞不遵竟未能一觀良劣經。將該署鎮總兵李克常撤任委員前往會同馬廠前後任遊擊李捷榮王長發逐細查驗另訂章程亟謀整頓奏奉

硃批該部知道片二件併發欽此欽遵在案茲據查馬印委各員

赴廠查點按上年十二月王長發接收李捷榮移交廠馬五千一百四匹內實點見駝騾馬四千四百六十二匹計短馬六百四十二匹稟報前來。一面將短少馬匹勒令該卸鎮李克常等如數賠償如不遵繳再行從嚴參追一面博訪久於此間之文武僚屬察度巴里坤時令水草今昔牧放情形爲謀改良之策現擬於該廠另立馬政局派管理員庶務書記查馬長馬醫生等專司其事馬羣改定足六百匹爲一羣取孳視舊例酌加兩倍挑變倒斃亦視舊例酌予變通烙印選種力求精密薪餉公費撙節酌定均齊仍照舊例年限伏查漢通西域自求馬始大宛產馬自古著聞方今列強各國研究豢馬之術取精用宏巴里坤馬廠固不易以一促幾而就其已有之根基可施之能力處產馬之區用馬之地自應亟圖整頓先求軍備得資實用良駟不至虛生孳生務求繁衍卽爲目前功效擬訂辦法十二條繕單恭呈

御覽如蒙

俞允仰懇

敕部先行立案容_臣分別造冊咨部所有巴里坤馬廠添設馬政局改良辦法各緣由是否有當謹會同伊犁將軍_臣廣福陝甘總督_臣長庚喀什噶爾提督_臣焦大聚恭摺具陳伏乞

皇上聖鑒訓示謹奏

宣統三年九月初五日

謹將巴里坤東廠孳生馬羣積弊太深日就廢弛現擬改良辦法繕單恭呈

御覽

計開

一宗旨 查東廠牧地水草肥美昔者孳生蕃殖今已日趨頹敗整頓馬政爲近今當務之急非剔除舊習大加改良不足望其起色茲擬辦法總以孳生暢旺倒斃減少良馬倍出以備軍用爲宗旨

一管理 查該廠向歸鎮標左營專管嗣因該營移駐古城相距

九站之遙而各羣牧長遂至任意舞弊茲擬另立馬政局一所設管理一員專司其事刊給關防一顆文曰管理巴里坤馬政委員之關防以昭信守分設庶務書記員一員查馬長一員司書生一名馬醫生一名護兵六名夫役一名每羣分設牧長一名牧副一名牧兵六名伙夫一名狗六頭槍六桿以備保護馬羣其各項管理規則自應因地制宜力從節簡俟有成效再行擴充

一改種 查該廠產馬桀驁不馴力有餘而德不足多不敢用現查羣內駝馬過多應酌量提出分別割驕另購高大良馬以期逐漸改良馬種

一杜弊 查馬羣雖有烙印尙欠研究以致盜竄盜換無從稽查良馬由是日少法宜分色分羣按號排列烙印以一號至六百號爲一羣繕造表冊按號詳記口齒毛片馬別高低有上等出羣之馬驗時於冊內註明盜竄盜換無從施其技

一取孳 查馬廠舊例三年三馬取孳一匹不准報倒法本至寬積久弊生一成毫無甚至照原數亦不足積弊不除事將廢輟茲擬改章除騾馬另歸一羣老口挑出變價餘按九騾一驄分配核計驄騾馬十匹每年取孳三成爲平均多則爲上等按次酌獎少則爲下等按次酌罰勸懲兼施以期整頓

一倒斃 查馬廠舊例除驄騾馬不准報倒外騾馬每百匹年准例倒六匹應請仍照舊章惟現擬驄騾馬孳生數目既照舊章加增兩倍倒斃事所常有應准核實具報馬皮變價以備購馬添補之用

一挑變 查舊例馬羣三年均齊百匹祇准挑變六匹茲查該羣老口馬已有九百餘匹設援舊例不准變通不特有礙孳生尤恐徒增倒斃擬此後每屆合羣時核計老口馬若干匹盡數挑出變價另購口輕良馬入羣以廣蕃殖

一薪餉 查現在該廠原有牧兵七十二名係食左營步兵之餉

每月每名三兩六錢扣建外領鹽菜靴鞋銀九錢每名每月共領銀四兩五錢六分長副均歸一律茲擬另設專員自應酌量加給以期得力擬設管理一員月支薪水銀一百兩庶務書記一員月支薪水銀三十兩查馬長一員月支薪水銀二十五兩司書生一名月支薪水銀十二兩馬醫生一名月支薪水銀十二兩護兵六名每名月支餉銀五兩四錢夫役一名月支餉銀三兩每羣設牧長一名月支餉銀十六兩牧副一名月支餉銀十二兩牧兵六名每名月支餉銀五兩四錢伙夫一名月餉銀三兩額狗六頭每頭月給喂養高粱市斗一斗除左營撥出步兵七十二名底餉仍照開支外不敷之款擬暫由後路巡防各營現有缺額未補截曠項下開支俟籌有的款再另開支以期持久

一分羣 查東廠現有五羣經牧馬數多寡不一茲擬六百匹爲一羣將馴馬剔出另立羣牧所產駒至三年後割馴撥歸馴

馬羣驟馴至三年按色分羣以補各羣缺額馬數增多再另添新羣牧養

一均齊 查馬廠舊例每屆三年爲均齊之期此次點驗烙印以現有實數仍從本年七月初一日起算至三年期滿爲一均齊考績之期以符定制

一公費 查該廠向無辦公經費牧兵等日夜輪班跟羣馳逐往來辛苦異常酷暑烈日烈風夏給毡笠冰天雪地冬須皮棉以及毡幕歲修騎馬釘掌每年合羣烙印柴炭套馬繩索局用一切燈紅紙札馬醫藥科處處需款宜酌給經費五十兩以資辦公

一水草 查該廠牧地春季游牧於鎮西廳屬松樹塘一帶夏秋游牧於巴里坤海沿一帶冬令游牧於烏兒水肋巴泉一帶馬政本游牧性質冬窠最關緊要近數年來頻患雪災倒斃堪虞應於開辦後詳細勘查確切繪圖貼說聲請立案免至糾葛請設于關縣屬卡牆巡檢員缺摺

奏爲于闐縣屬卡牆地方添設分防巡檢以資佐理恭摺仰祈
聖鑒事竊邊疆遼闊設官分治宜視土地人民以爲增進新疆自
光緒十年前撫_臣劉錦棠奏設佐雜各缺凡於距隔州縣寫遠之
區皆設分防巡檢至二十八年_臣饒應祺斟酌損益昔時巡
檢缺或改縣丞或升爲縣劃地編氓頗多增改析于闐縣之洛浦
莊設洛浦縣升新平縣之卡克里克縣丞爲婁_羌縣而于闐東境
千有餘里有村落名卡牆與婁_羌接壤其地爲漢且末城故址後
晉陷河出其間古陽關西行大道也休養生息多歷年所現已有
居民七百餘戶男女丁口二千九百有奇耕牧相安攜家室長子
孫攘往熙來駸駸乎有成聚成旅之象水土亦復饒沃上年署婁_羌
縣知縣唐光祿請以卡牆改隸婁_羌據司道飭屬查考覆加審
度卡牆實聯絡于婁_羌之要境以道里計則婁_羌近而于闐以民戶計
則婁_羌少而于多東距婁_羌縣治八站馬行八日可達途多沙磧西
距于闐縣治十一站馬行九日可達途多平坦按現時情形而言

居其地者大率于關疆回遷往貨殖交易婚姻通問利便於于關者實占多數若改隸塔羌轉非因勢利導之宜生齒既已日繁治理未便仍略縣令控馭不及自應添設分防巡檢一員仍隸于關縣屬以資佐理地處邊塞要隘應即作為要缺由外揀補其衙署廉工一切規制悉照前設各屬分防巡檢辦理相應請

敕閣部院駁議以便實行所有添設于關縣分防卡牆巡檢員缺各緣由是否有當謹會同陝甘總督長庚恭摺具陳伏乞

皇上鑒訓示謹奏

宣統三年十月二十二日

添招馬步軍隊備補防營空額片

再新疆軍營積疲太深無論如何整頓總不能痛改前非秋間派員點驗各路巡防管隊先與約明寬其既往不必屢人頂替所有空額人數由派員回關另募精壯來新添補現因陝陷路阻急切難以辦到各路防範宜密又未便聽其久懸喀什噶爾前路馬步隊已飭提督焦大衆就近挑募精壯補足原額伊犁巴里坤為

產馬之區先將馬隊填補阿克蘇左路向不產馬亦鮮民壯連伊犁巴里坤兩路步隊空額統在省城由挑練步隊三百名馬隊二百名親督訓練期成勁旅以備緩急餉項由各路裁贖內開支無須籌添新餉俟防務稍鬆再行撥歸原營添補足額謹附片陳明伏乞

聖鑒訓示謹

宣統三年十月二十九日

代奏提學使開缺回籍摺

奏爲據情代請開缺回籍修墓恭摺仰祈

聖鑒事竊據新疆提學使杜彤稟稱竊彤擬請回籍修墓於九月二十三日稟懇據情具奏蒙批稟單均悉現值內地多事驛道梗阻修墓事可緩行未便遽准

天聽一俟事平道通如果必欲解組旋里再行據情代奏可也此繳因奉此彤何人斯竟蒙優眷自應謹遵靜候不宜再瀆憲聰惟旬日以來體察新省學務可辦者更屬寥寥坐糜廉俸自問何

安是以修墓之心愈形迫切現聞鄂陝軍務均甚得手事平道通指日可待敢祈俯鑒愚忱准照前稟早日據情具奏庶幾關山遠道得徐理夫歸裝驚寢庸材免貽譏於戀棧並據函稱彤請假修墓志念已堅昕夕思維未能稍釋儻積久不遂恐成心疾有負更多不得不再行瀝陳各等情前來查新疆孤懸絕塞外患內憂本較內地爲急現值陝陷道梗餉源斷絕飢潰堪虞奏停各項不急之務騰出微款以顧餉需藉保土地人民一俟事平道通餉源有著再行逐漸擴充新政此亦一時不得已之權宜屢經開誠布告再三挽留該學司一再請假去志甚堅自亦未便強留合無仰懇

天恩俯准新疆提學使杜彤開缺回籍修墓俾展孝思出自逾格鴻慈再現在各處搜羅藉顧兵餉仍苦不足新疆學務大概停辦有學務公所足可辦理提學使一缺可否暫緩簡放以資掄節俟事局稍定餉有來源再行請

旨簡任專司以符舊制合併陳明所有代奏提學使懇請開缺回籍修墓緣由謹會同陝甘總督長庚恭摺具陳伏乞

皇上聖鑒訓示謹奏

宣統三年十月二十九日